


Jan FOURNEL
Majourau dau Felibrige
LOU MOUNT DAU LUM
(Legenda de la Matrà)



1914

*E parlaren de nòsti rèire.
Soungen qu'an fa mirando,
E grando, e grando!*
F. MISTRAL

*... Sur mon sol sacré, sur la terre où s'incorporent mes pères qui la firent,
tout respire et enseigne leur histoire.*
Maurice BARRÈS.

Aïço's pas un libre d'Istòria.

N'en manca pas de libres istourics sus Mount-Peliè e sai-que, belèu, n'i'a pas una altra ciéutat de França qu'aje enfioucat couma ela lous escrivans, lous omes d'estùdi e lous dessoustaires de vièls papiès.

Aïço's simplement la Legenda de la Matrà, debanada en douge racontes de glòria, — soun Ate de trioune .

Ah! que m'agradariè s'aquesta Legenda, escricha dins la parladura das grands, s'istava, aquesta Legenda, couma una font de matrioutisme mount-pelieirenc ounte vendriè s'amourrà la jouïnessa de ioi, — aquela paura jouïnessa que crenta d'estrassà soun tems se legis lous libres das saventasses ou se tafura lous pergamis cargats de la poulbèra das archieus — e de la nobla ardidessa d'antan!

Lou Chivalié de las Claus

I

Desempioi que Carles-Martèl aviè Lach un noun-res de la ciéutat de Magalouna; desempioi qu'el viviè couma despatriat à Sustancioun, Aigulf aviè la sentida de quauca altra mau-parada. Sous enfants Witiza e Amic, amai que seguèssoun jouïnets, anavoun rejougne la novella armada de Setimanà que s'esbrandava contra lous Sarrasins e cercavoun de l'apassiounà à sous pantalès de revenge e de glòria. Res lou desenlagnava. Aigulf, comte de Magalouna e de Sustancioun, apensit, souscava de-longa e se languissiè de la mar.

Soun loubatiè e soun renardiè avièn bèu lou secutà amor que se bandiguèsse emb'eles à la cassa dins la coumba de Vau-Fèra ou sus lou mount proche — que s'aclinava dau coustat dau Levant jouta lou pés d'una fourèst de blacasses et d'una bouscalha tant aboundousa que, Lez semblava ralentà soun cours dors la Mediterragna pèr l'encéuclà à miech de la força de sas aigas verdas ourletadas d'isclètas erbousas e de ninfèia flourida. Dins soun enòdi, Aigulf planissiè lou tems que, au mitan de la palun, dins lous ajouns, acoussejava en barquet lous alabrans qu'alatejoun ras de la lona, lous tourriès que dins sas ploumas bagnadas lusissoun lous grans de sabla, las foucas à las alas negras e lous gabians enblancats.

II

Magalouna la granda iscla, Magalouna lou port de Maïa, Magalouna la druja èra avalida e, pamens, cadé mati, sourtissièn de la mar amaliciada, parièiras à-n-una revoulunada de tartarassas e de corbs-marins, de novellas chourmas levantesas. Quau sap s'èra estat ben empusat, Carles-lou-Roussèl, quoura, pèr barrà la retirada as Maugrabins, aviè desquilha la vila, laissant s'adrechà soula, pèr ié dire messa de sous morts, laatedrala esquinsada? E, dins l'ime d'Aigulf, Carles-Martèl aviè l'estec d'un saure maugrabin, d'un barbare dau coustat d'aut, engèni dau degai e de la destrucioun.

Magalouna qu'aviè reçachut dins soun barcarès lous bastiments lous mai poudèrouses, las galèras arnescadas glouriousament que tout plé, Magalouna l'autieira èra pus qu'una arroïnacioun e lèu, tout l'annouçava, sariè lou tour de Sustancioun, proia facila pèr lous enfants de Maumet, que la cremarièn, avans que s'adralhèssoun pèr la via doumiciana, qu'ela aparava, à la counquista das païses prouvençaus. Soulide que trioufarièn: Aigulf s'èra adejà aubourat davans eles embé toutes lous comtes e barouns de la Setimanà, mès sa troupelada, mai tourmentala que las aigas mediterragnencas, aviè tout enrabalat. Encara un pauc e dins aquel escafarnèl Aigulf segnourejariè pas pus que sus de parets endavaladas e rabinadas.

III

Aigulf se counselhava dau talmudista Juda Ben-Zohar, esperit universau que, pèr escaïs-noum, lou sounavoun lou Lum. Èra, de-fèt, un flambèu de la sciènci jasiola e de la sciènci de la medecina. A Lunèl, ounte proufessava la filousoufia, l'arregardavoun couma l'interprète majourau de la dóutrina d'Averrhoès.

Aigulf ié mandèt de veni que ié vouliè parlà.

Ben-Zohar prenguèt lou comte de Magalouna se passejà emb'el e toutes dous s'acaminéroun, pèr lou pont de boi das bouscatiés, dors la fourèst. Era l'oura dau calabrun qu'agandissièn à la cima dau Mount.

— Aigulf —, sou disiè lou talmudista, — as pas pougut toumbà Zama, lou lioc-tenant dau calife, e veiràs lèu Tamarin-lou-Moure se prouclamà segne de Magalouna. Deman, Luna, la novella Jerico, fougau de nosta sapiença s'aclatarà jouta la jota de l'aclapaire. Mès tus triounfaràs dins l'Aveni. Magalouna respelirà... Vèni dins la nioch ausi lous devinaires!

E tant-lèu, davans eles, s'aplantoun dous aubrets lumineuses que, d'abord asseparats l'un de l'autre, fan pioi qu'un soul aubràs à doubles racinas. Emb'aco d'aquí espelis una manida embé dos tèstas. Las dos tèstas, elas atabé, n'en fan pioi qu'una lusissenta de béutat e clarejanta de glòria, que se mes d'aproufetisà l'aveni dins aquesta dichà:

Comte de Magalouna e de Sustancioun, segne Aigulf, escouta:

Toun poudé persounal es sempre anequelit, mès toun fil Witiza sara menaire d'amas jouta lou noum de Benezet d'Aniana.

Arnaud-lou-Grand rebastirà Magalouna e dins sa catedrala que s'enduràrà jusqu'à la fin dau mounde cinq cops pountificarà la tiara de Rouma.

Aqueste terraire apartèn à ta Raça; aqueste Mount prouclamarà lou trelus de toun noum. Sourtis de Sustancioun que raufeleja, çai vèni aici plantà bourdou e bastis ié dos bourgadas pèr ié caupre toun sagatun. Tas pichotas filhas, Elisabet e Judit, n'auran lou franc-alòdi, dau tems que toun pichot-fil, Foucrand, apraticarà dins Loudeva lou mestrige esperitau. Bastis dos bourgadas, t'hou coumande, e aquelas dos bourgadas, que las apeleran Mount-Peliè e Mount-Pelieiret, fourmaran la nobla e poutenta cièutat de Mount-Peliè, lou Mount de las bellas manidas, Mons puellarum, Mount-Peliè l'esbrihaudanta, Mount-Peliè la saberuda, Mount-Peliè l'abelana!

Mount-Peliè s'eschalatarà aici, jouta la capa dau sourel, couma una cardavella sus lou rocs qu'enviròutoun Sustancioun.

Mount-Peliè assaventarà lous esperits e sanarà lous cors. Sanarà lous cors pèr la sciènça de sous omes de l'art e pèr la fe e lou sacrifice de soun illustre enfant, Jan Roc.

Davans la majestat antica de sa Vierja de las Taulas, papas e soubeirans toumbaran d'à-ginouls.

La Raça das Guillèms, que vendrà après tus, alargarà soun autouritat fin-qu'au poudé reial; antau mestrejara la terra d'Aragoun, — e es ela que coungreiarà lou Counquistaire.

” Mount-Peliè sarà lou fougau de l'autounoumìa e de l'independença. Toutes lous poples, enamorats de libertat, çai vendran coupià lou Libre de sas franquesas que la Cièutat gardarà dins una de sas tourres, devenguda una de las tourres de la Sapiença umana.

Mount-Peliè sarà terra de Gai-Sabé e es ben à tus, o Aigulf, que se pot boutà lou titre de Chivalié de las Claus, que sarà tant famous dins lou rouman de la Bella Magalouna.

Aigulf maneges la claus de l'Aveni. Aubeïs!

IV

Aigulf çai mandèt lous peiriès de Sustancioun e enaurèt tous primadiès apeouns, o ma douça Matrà, o Mount-Peliè!

I

La Mort de l'Espasa

Desempioi tres ans, adeja, Guilhèm, comte de Toulouse e duque d'Aquitani, lou gigant ferouge clafit de bercas, aviè cargat lou froc de mounge. Umil e soumés couma lou darniè das fraires, el embaumava dau perfum de sas vertuts l'abadiè de Gelouna, qu'èra el que l'aviè mountada e enrichida.

S'entachava de basti la font de la clastra, quoura l'abat, Juliofrech, ié venguèt legi un escrich de Carle-Magna. L'Empereire coumandava as enfants de Guilhèm: Bera, Bernat, Eribert e Gaucèlmi, de pourtà soulennament à Gelouna l'espasa de soun paire. La nobla armadura se capitava à Briéude d'Auvergna, sus l'autar de Sant Julian-lou-Souldat, ounte Guilhèm l'avié alairada lou jour ounte traguèt soun à-Diéu-siàs au mounde.

II

La translacioun se debanèt dins lou desbord de la joia de tout lou país d'Aniana e de l'escalugna dau sourel.

Cleoudufe d'Autun, l'ancien gounfalouniè de Guilhèm, istava davans lous omes d'armas que carrejavoun sus sas espanlas lou glàsi glourious. Bera, Bernat, Eribert e Gaucèlmi caminavoun d'après. Juliofrech e seissanta de sous mounjes reçaquèron l'espasa à l'intrada de Gelouna. A l'entour de Juliofrech s'èron enrengats Nebridius archevesque de Narbouna; Benezet, abat d'Aniana; Witmar l'asceti, l'ama la mai blousa dau diocèsi de Magalouna; Ainian, abat de Sant-Chinian; Atilioun, abat de Sant-Tibèri e la flou das proues chivaliès de la Setimanìa: Fermin, de Melguel; Gui, de Mount-Peliè; Gentian, de Bèu-Caire, e Bernat, d'Ate.

Alounguèron l'espasa sus un autar de lausiès, davans la santa estelha de la veraia Crous, ouferta de Carles-Magna e, dins l'auditorium, Benezet d'Aniana la saludèt davans toutes:

— Glòria à tus, flambejanta espasa, digna sorre de Jouiousa, de Durandal e d'Auta-Clara! Ounou à tus, o majestousa, qu'es tus qu'as desmalhat milanta aubercs e desfounsats de milhassadas d'èumes de ferre-sedat! Mount-Joia! Glòria à tus, glàsi de Diéu, que brassejèt dins mai de cent batadissas Guilhèm la dèstra dau grand Carles! Mount-joia! Ounou à tus, espasa crestiana e franca, chaplaira espetaclousa. Glòria à tus, o ufanousa, qu'es tus qu'as espaurugat Abdel-Melek e sas couhortas sarrasinas que desboudavoun dau pertout! Glòria à tus, o poudèrousa, qu'es tus qu'as tenchat dau sang das Maugrabins las aigas de l'Ourbiéu e las oundadas de l'Aude! Siègues benesida dins la memòria das siècles, santa tustaira dau Val de Dagna, sempre abramada de vitòrias e de triounfe!

Te vejaici morta, o valentousa; seguères un cors magnific que Guilhèm n'èra l'ama. E l'ama s'es escapada dau cors pèr toujours!

Fraïres, cau mourir! Mouriren, nautres, un jour, couma es morta, ioi, aquesta espasa! Ela coumpliguèt las gèstas de Diéu; nautres fasèn pas que pecà contra Diéu; — en ela istava l'enavans; nautres fasèn pas que capounà; — ela sagatèt lous mescrements; nautres savèn pas soulament faire calà noste michantige! Vergougna à nautres, glòria à l'Espasa!

Sou diguent, Benezet d'Aniana escampilhèt lou fum embaumat de l'encensié sus lou glàsi erouïc.

Nebridius faguèt un sinne e Guilhèm, que l'aussada d'aqueste esclapàs

d'ome pareissiè encara mai grandassa dins la rauba negra e jouta lou capuchoun de mounje, Guilhèm arrapèt l'espasa de las dos mans.

Saliguèron toutes en prouessioun de l'abadié e s'adralhèron, pèr un carrau, au mitan das vabres, dors lou desert de la coumba. Dins una avalancada de roucasses, en riba de Verdus, badava lou cros. Guilhèm i'entarrèt soun espasa...

Sus la verdesca dau moustiè de Sant-Bartoumiéu, las mounjas, que las bailejavoun Bertana e sa segoundària Albana, toutes dos sorres pèr lou sang de l'ancien duque d'Aquitani, las mounjas cantavoun lou Miserere.

III

Dourmis soun som eterne, au mitan dau mistèri de soun cros, l'espasa de Guilhèm, dins la coumba sournada de Gelouna.

La Filha de Bizànci

I

D'en-naut de sa tour de sa tour qu'aparavoun de balistas e d'espringalas, la gacha cridèt l'aventada dins lou carretal de Lunèl d'una cavaucada e d'una longa renga de carradas de toute mena de biblot. Lou serjant d'armas s'acoussèt n'avisà Guilhèm VIII.

Lou segne de Mount-Peliè, qu'aviè à soun entour quauques bourgeses de la ciéutat, èra de parlament embé lous estajans de Castèl-Nòu à perpaus d'un mouli que s'agissiè d'establi en riba de Lez.

Guilhèm mandèt querre lèu-lèu sa nebouda, la poulida Gida de Moundàs, e, de coutria emb'ela e quauques-uns de sous chivaliès, anèron esperà à la porta de Sant-Gèli, pèr ié faire ben-venguda à

Mount-Peliè, l'auturoussa e poudroussa princessa Eudoussia, filha de Manuèl Coumnèna, emperaire d'Ourient.

La princessa èra achivalada sus una acanèia grisa, e trenta ouficiès emperiaus, bailejats pèr l'avesque Gregoros e dous segnous de la court de soun paire, ié fasièn coumitiva. Margara, soun amiga de fisança, se tenié à sa dèstra.

Guilhèm, mai que galant, saludèt devouciousement la filha de l'emperaire. Mès l'enarquilhada manida, sans ié lengejà un gramecis, sans soulament ié faire bouqueta, davalèt de chival e, s'arquetant au bras d'un segne grec, intrèt dins l'oustau das ostes, ounte la seguiguèt, touta crentoussa, la paura Gida de Moundàs.

II

Guilhèm sounèt soun cap d'armas, Jan de Souriech, amor que voulié parlà au pus lèu à l'avesque Gregoros. Lou prelat çai venguèt davans Guilhèm.

— Digne avesque, sou diguèt lou segne de Mount-Peliè, ai de vous faire assaupre la marrida estamina qu'espéra, en terra d'Aragoun ounte s'envai, la nobla princessa Eudoussia: lou rèi Anfos es maridat; a'spousat, i'a escassament una mesada, dona Sancia, infanta de Castilha.

— Ce que disès aqui, bèu segne, respoundèt Gregoros, es pas poussible. Una ambassada de princes e de barouns aragouneses es venguda à Bizànci demandà en granda poumpa à l'emperaire, moun poutent e ben-aimat soubeiran, la man de sa filha, la princessa Eudoussia, pèr lou rèi Anfos II d'Aragoun.

Manuèl Coumnèna, tant en soun noum qu'au noum de la princessa, a agradat la demanda. Anfos e Eudoussia soun acourdat. Mene la filha de l'emperaire au rèi que ié déu cenchà la tèsta de la courouna d'Aragoun. Encara quaucas estapas e nous agandiren.....

— Nàni, coupèt Guilhem, nàni, noble avesque. Anfos d'Aragoun aco's vrai, a demandat pèr mouilhè Eudoussia Coumnèna. Sas acourdalhas soun estadas encantadas au Papa; mès, de tout aiço, i'a dech meses au mens e, desempioi, vous hou redise, Anfos II a espousat dona Sancia, infanta de Castilha.

— Aco pot pas èstre, que se braveja pas antau l'emperaire d'Ourient.

— Vous caucione qu'es vestadiè ce qu'afourtisse. De-que s'es-ti passà? Es-ti trop restada, la princessa, à rejoune soun afiançat? D'arrenjaments de poulitica an-ti boutà Anfos dins la necessitat de pachà pèr matrimòni emb'un soubeiran vesì?

— Se pot pas milhou pachà, sus aquesta terra, qu'embé l'emperaire dau Levant quoura vous baila sa filha.

— Aubé. Mès vous conte pan pèr pan lous evenaments. Lou baile de mas rendas e de mas fasendas, Pèire de Mascoun, que rintra de mas terras de Tortosa d'Espagna, s'es capitat à la ceremouniè dau maridage d'Anfos.

— Que lou rèi que se desparaula d'aquel biais crenigue l'ira de Bizànci! Una tala felounié...

— Remendarai l'escorna facha à la courouna d'Ourient, iéu Guilhèm VIII, pèr la gràci de Diéu, segne de Mount-Peliè.

— Pèr la gràci de Diéu?... Segne de drech divin, vous, Guilhèm?

— Aubé sai-que, avesque Gregoros! Belèu que deman la raça das Guilhèms farà tant de pès que la raça das rèis d'Aragoun. Desempioi lou jour ounte moun rèire-grand, Gui, reçachèt de l'avesque de Magalouna lou drech de mestrejà lous affaires d'aqueste país, granda obra an coumplida lous Guilhèms, sous enfants. Mount-Peliè es ioi una ciéutat flourissenta. Parle iéu, parle en rèi dins moun fiéu de Tortosa. Mous vint castèls, verquieira counsequenta, avitalhoun de la frucha aboundoussa de sas terras mous bourgeses e moun pople.

Moun ounce Gui-lou-Guerrejaire a gaubejat moun esperit e lou sang de Guilhèm VI, Guilhèm-lou-Crousat, l'éros dau sèti de Maarah, raja dins mas venas. Lous quatre cent setanta chivaliès de Mount-Peliè soun una armada d'elèi. Ai fisança dins l'astrada das Guilhèms.

Segne avesque, amerite de remendà l'escorna facha à Eudoussia Coumnèna: vous ademande la man de la filha de l'emperaire...

III

Entre qu'aprenguèt qu'Anfos se coumpourtava tant mau à soun respèt e qu'ausiguèt de la bouca de Pèire de Mascoun lou raconte dau festenau dau maridage dau rèi d'Aragoun e de dona Sancia, la princessa Eudoussia vouguèt s'embarcà à Magalouna pèr rintrà à Bizànci ademanda venjança à Manuèl soun paire. Mès l'avesque Gregoros, rebecant qu'èra d'esperà las ourdounanças de l'emperaire, remandèt la partença.

Das prumiès tems, Eudoussia demourava dins sa cambra, souleta embé sa genta Margara. Mès à la fin seguèron tè tus tè iéu embé Gida de Moundàs. Lou gàubi trîa e couquelin de la nebouda de Guilhèm

pivelèt l'esperit refastigous de la princessa. S'amiguèroun de tout soun cor e toutas tres emb'una pichota coumitiva cavauquèroun dins lous parages de la ciéutat.

Eudoussia counvidet à-n-aquelas passejadas Guilhèm VIII e lou troubaire Ebles d'Aucelet que sa galoietat l'amusava foça. La nobla coumpagna s'adralhèt dors lous castèls majouraus de Guilhèm: Pignan, Mount-Arnaud, Mujoulan, Castràs, Mount-Bazin, Mira-Val, e s'acaminèt saludà lou comte de Melguel, que faguèt picà de poulits sòus mauguoulencs d'or en l'ounou de la filha das Coumnènas.

Pioi la vesiada princessa barrulèt dins las carrièras de Mount-Peliè en mitan de las aflatadas e de las ounestetats alargantas das bourgeses e das mestieirus. Dins las boutigas das argentiès, das ouliès d'estam, das pelatiès e das sediès, Guilhèm oufriguèt à l'emperiala visitaira milanta causas mai que friandas. Mès ce qu'agradèt lou mai à Eudoussia aco saguèt lous mantèls e las raubas d'escarlata que lous cardaires embarcavoun à Magalouna à destiacioun de touta pouncha de la rosa das vents e que las fennas de Bizànci, — la princessa s'hou rementava prou — n'avièn tant enveja.

Eudoussia vouguet veire oubrà lous famouses tinturiès. La menèroun à la Drapariè-Rouja ounte lou cap-mèstre das mestieirus ié faguèt coumprendre couma arrivava qu'embé las couchenilhas das garruts, mai qu'aboundouses dins las terras de Mount-Peliè, se fasiè une tinta d'un rouge tant trelusent. Au noum de sa courpouracioun, lou cap-mèstre oufriguèt à la princessa una rauba d'escarlata relevada de broudariès d'or.

La princessa, de mai en mai afrescadeta, aimava d'anà faire lou repassoun au mas de Caraveta, que sas figas e sous muscats roussèls, qu'ela mema anava coupà dins las gàbias, èroun, sou disiè, mai que goustouses.

Ebles d'Aucelet escriviè de cansous e de baladas que dedicava à Eudoussia e couma la manida levantesa s'afeciounava à la pouèsia, Peire de Fabre, lou baile de l'oustau segnourau, mandèt querre Arnaud de Maruèl, Guilhèm de Balaruc, Foulquet de Marselha, Aberlet de Sisteroun e Gui d'Uissèl, lous troubaire familhès de Guilhèm, pèr teni court d'amour.

Las douças cantilenas e lou clarejage d'Endoussia enfadèroun lou cor de Guilhèm VIII.

Eudoussia èra la norma coumplida de la bèutat gréca: soun buste plegadis, soun front linde, lou dardal de sous iols, sa cabeladura d'or resplendenta, tout soun anà majestous n'en fasièn un èstre d'armounia. Atabé, un vèspre, dau tems que lou troubaire Ebles d'Aucelet roussignoulejava couma lous estajans dau bouscage, Guilhèm, segne de Mount-Peliè, alandèt soun ama cremanta à la nobla fourestieira:

— “ Aquesta terra es pèr vous, o ma Dona, la Patria expandida. Se i'atrouvàs pas las magnificenças que l'engèni uman n'a encluchat Bizànci, vesès aici, jouta soun cièl blous, dins la flambou de soun lum levantés, au vesinage de las aigas de la Mediterragna que vous revertoun voste Bosfore, vesès couma la vida es douça... Aimen-nous!...”

— Segués moun inspirarela. Es vous, n'ai la sentida, qu'agandirés ma raça à l'espelida d'aquela dinastia de counquistaires pantaisada pèr Gui-lou-Guerrejaire...

— Vous aime!..... ”

S'aluquèt d'un risoulet la cara d'Eudoussia e la filha de Bizànci, fricaudeta, boutèt sa man dins la dèstra de Guilhèm VIII, segne de Mount-Peliè.

IV

De soun maridage nasquèt, un an d'après, la que prègue couma la Santa de ma matèria, Maria de Mount-Peliè.

Maria de Mount-Peliè

— Oi, cara Azalaïs, i'a de mouments que farièi la mema prèga que moun rèire-grand Guilhèm VI. Savès qu'à l'oura de dire adissiàs as grandetats d'aqueste mounde pèr s'anà entarra, ple de vida, au mounastiè de Grand-Selva, el vouguèt, davans de parti de Mount-Peliè, venerà à Sant-Fermi lou cors de sant Cleoufàs, que soun paire çai rapourtèt das Liocs Sants, e s'agînoulhà as pesès de beneta dona Santa Maria de las Taulas. Se dis qu'atalentat que dau sauvament de soun ama, preguèt la Majestat Antica de ié faire perdre la memòria de tout ce que saviè, à soula fin que se rementèsse soulament que d'aquestes dous mots: Ave Maria. Seguèt enausit.

Eh! be! à moun tour, iéu voudrièi outeni de la rèina dau Cièl la gràcia de tout desoublidà das evenaments de ma vida pèr pas pus saupre dire qu'Ave Maria.

Oi, voudrièi desoublidà que, maridada à douge ans à Barral, viscomte de Marselha, me soui avéusada pau après e que m'an remaridada à quinze ans à-n-un coucha-tard, Bernat IV, comte de Coumènges. Voudrièi desoublidà que Coumènges m'a repudiada e, dins ma viva desirança d'èstre benfasenta au paure mounde, me sembla que quicon me crida de counsacrà ma vida, dins aqueste oustau foundat pèr un das miéunes, Gui dau Sant-Esperit, à recatà lous paures e lous abandonats.

Es antau que Maria de Mount-Peliè, eiritièira das segnous de Mount-Peliè, paraulejava sous lànfis en fisant lou founs de soun cor à Azalaïs de la Marca-Rosa, sa dama d'ounou, dins una cambreta de l'espitau de l'ordre dau Sant-Esperit, au Pilà Sant-Gèli.

Las dos jouïnas fennas marcavoun lou countraste lou mai picant. La cara de Marìa, assournida, semblava adoulentida pèr lou patiment de soun ama magagnousa, mès soun pale risoulet acertava soun resignament. Pèr quant à-n-Azalaïs de la Marca-Rosa, flourada e agradabla couma soun noum, èra d'un biais tant galant qu'entre de la veire aco vous regaudinava lou cor.

— Voste desaire es grand, Dona, respoundiè Azalaïs. Se i'aplanis lou bon pople de Mount-Peliè. Pensés pas, pamens, de vous vitimà pèr lous mesquins; d'autres grands devés vous sonoun.

— Ai renouçà à toutes mous drechs sus la segnouriè de Mount-Peliè au moument de mous dous maridages.

— Ben inutila èra aquela fourmalitat pioi-que, d'après las agissenças de vosta mairastra, Agnès de Castilha, voste paire Guilhèm VIII vous aviè annegada.

— Lou segne de Mount-Peliè es ioi Guilhèm IX, moun fraire.

— ... adulterin, Madama. Mès n'an prou lous bourgeses e lou pople. Viéu pas jamai aici. Passa soun tems au castèl de Mount-Ferrand ou s'envai cassà lou pèis-porc sus lou pioch Sant-Loup. Las gents afermissoun qu'el trouvariè tout naturau que lou despoussedèssoun pèr vous restabli dins vostes drechs.

— Filha lèima das Guilhèms, soui à la coumanda de moun pople.

— Recounouisse ben aquí Marìa de Mount-Peliè. Nàni, sès pas nascuda pèr dintrà dins l'ordre dau Sant-Esperit. Soulide que sensa descaire pourriàs vous i'arregueirà pioi-que, hou disiàs tout-ara, es un de vostes aujòus que l'a mountat e n'es estat lou prumiè grand-mèstre. Aquel ordre de chivalariè caritadousa es una de las grandas foundaciouns mount-pelieirencas. Doubris cade jour un oustau novèl: ièr à Marselha e à Milhau, ioi à Troia e à Rouma, deman...

— Coumença de se realisà lou mot de l'avesque Jan de Montlaur:

Lou mantèl das chivaliès dau Sant-Esperit, lou mantèl blu cerulenc, floucat de la crous blanca à douge pounchas, coumplirà la virada de la terra. ”

II

Lous conses de Mount-Peliè deliberavoun soulennament:

— Aïço pot pas durà, averava lou prumiè conse En Luchas Polverel. Nautres, lous conses, bailejan lous affaires, mès degus representa pas Mount-Peliè davans lous poples. Guilhèm IX se rënd justïça: usurpaire à malo abandouna mouralament lou poudé.

— Tendren soun desistament, ajustava En d'Orlhac, lou tresième conse. S'agiriè de maridà Marìa de Mount-Peliè.

— Crestiana couma la savèn, Marìa recounouitrà jamai sa repudiacioun pèr Bernat de Coumènges.

— Mounsegue l'avesque de Magalouna outendrà l'annulacioun d'aquel maridage, afourtissiè En d'Orlhac.

— Mès après l'abouliment, embé quau maridaren nosta Marìa tant desarda?

— A l'oura de sa mort, Guilhèm VIII boutèt Mount-Peliè jouta l'aparament das rèis d'Aragoun. Demanden au rèi Pèire II d'Aragoun de cercà 'n espous à Marìa.

— Marìa s'amerita d'èstre rèina.

— Aladounc bailèn-ié Pèire II.

E d'una voues unenca, lous douge conses oufriguèroun à Pèire d'Aragoun de deveni soun segne en espousant la filha legitima das Guilhèms.

III

Desempioi mai de dous ans adejà, Pèire d'Aragoun s'èra maridat embé Marìa de Mount-Peliè. Mès lous conses couma lou pople patissièn un cop de mai de l'abandon de sa bona soubeirana. Un pauc trop chanjourlet, Pèire degalhava sa jouïnessa dins las fèstas catilhousas dau gourrinage, à Barcelouna, dau tems que, souleta, pecaire! la paura Marìa lagremava à Mount-Peliè.

— Sariè grand desounou e esfraïousa calamitat pèr Mount-Peliè, disié au conse En Ramoun de Gordoun, lou canounge En de Verda-Fiolha, ouficial de Magalouna, aco sariè calamitat se nosta douça Marìa esculava pas un eiritiè!

— Paura fenneta! soun ome la despresa en plen. Es aquela qu'a pas dau bonur!

— E dins lou pauc de tems que çai rèsta aici, Pèire d'Aragoun la regarda soulament pas; sous iols dardalhoun que pèr dona Azalaïs de la Marca-Rosa.

— Té, moun car canounge, avès arremarcat?

— Lous vièls sèn lous milhous devistaires das affaires dau cor. S'aproufitaven d'aquela passioun?...

— Coussi?... De-qu'es aquesta idèia? Dona Azalaïs es una ounèsta fenna e d'una granda candetat.

— Ela e Marìa de Mount-Peliè soun dos amas sorres.

— Alor?

— Vole pas mouri sans que mous iols ajoun vist l'eiritiè de la Segnouriè de Mount-Peliè. E se fai tard! Ai enzengat una pichota engana. Pèire d'Aragoun vèn be d'annouçà que sariè lèu aici?

— Dins dos senmanas, mossen l'ouficial.

— Perfèt, segne conse. Antau qu'aco m'arriva chaca fes que lou rèi d'Aragoun ista au mitan de nautres, ourdounarai, de moun titre d'ouficial, de preguièiras publicas pèr l'aguda d'un eiritiè. Aqueste cop farai milhou encara, car ajuda-te e lou cièl t'ajudarà. Vejaïci:

Anàs, valent conse, anàs cargà vosta rauba rouja e coufà voste capeïroun negre. Aqueste aparat bailarà un entre-signe soulènne à la missioun prou besuqueta que vous fisa lou canounge de Verda-Fiolha, ouficial de Magalouna, lou mount-pelieirenc lou mai fidèl as Guilhèms.

Anarès au Terral, enco de dona Azalaïs de la Marca-Rosa e ié dirès que dins aqueste affaire déu arregardà que l'interès de sa santa amiga Marìa de Mount-Peliè. Ié passarès lous ordres de l'ouficial: Azalaïs aurà de respondre à las espinchounadas que, couma à soun ourdinàri, Pèire II defautarà pas de la gratificà.

— Grand Diéu! ounte n'en voulès veni?

— A-n-aïço tout simplament: Dona Azalaïs aproumetrà au rèi d'anà emb'el, la nioch, dins sa cambra, mès dins l'escurisina.

— Coumprene: es Azalaïs qu'aproumetrà e sarà Marìa que tendrà la proumessa d'Azalaïs. Ben jougat, mossen l'ouficial. Mès d'aquel tems, de-que faren de l'ome d'Azalaïs?

— Grand amic de Guilhèm IX, lou mandaren cassà lou pèis-porc au pioch Sant-Loup. Pèr Santa Marìa de Vau-Verd, vole perdre ma prebenda se d'aicis un an lou pople mount-pelieirenc n'a pas l'eiritiè que tant sona de sous vots! Dins aqueste espèr, m'envau pregà sant Cleoufàs pèr que las causas viroun ben.

E lou bon canounge s'aliontèt tout alegret.

IV

Sant Fermi e Santa Marìa de las Taulas esbrilhaudavoun dau trelum de mila calèus de cire. Un ajust de mounde roumplissièn Santa Marìa de las Taulas. Toutes respoudièn embé fe à las envoucaciouns que d'en-naut de la cadieira l'ouficial de Magalouna, dins un vanc magnific de leiautat mount-pelieirenc, mandava à la Vierja aparaira de la Ciéutat. As oustaus, las gents qu'avièn pas pougut dintrà dins las glèisas s'èroun aginoulhats pèr debanà devouciouslyment l'Avé.

Dors las nòu ouras dau vèspre, En de Verda-Fiolha, laissant lou pople d'aboucoun, se gandiguèt à l'oustau dau Counsulat. I'atrouvèt à l'entour de Marìa de Mount-Peliè e de dona Azalaïs lous douge conses en rauba rouja, douge bourgeses, douge mestieirus, douge donas, douge manidas e dous noutàris. Tout aquel mounde aluquèroun de cires signats e fuguèroun escourtada à Marìa de Mount-Peliè e à mossen l'ouficial de Magalouna, coufle d'emoucioun. La proucessioun s'adralhèt dins las carrièiras au mitan de las prègas dau pople. Aventèt au palais dau rèi: lous lums èroun toutes damoussats e lous chivaliès èroun toutes enmandats antau qu'aco èra estat arrestat, pèr bilheta, entre Pèire d'Aragoun e dona de la Marca-Rosa.

Azalaïs piquèt dous cops tres cops e... Marìa de Mount-Peliè, mai que crentousa, dintrèt souleta dins la cambra de Pèire, dau tems que toutes lous autres abitavoun davans la porta pèr pregà Diéu.

V

Lou lendeman mati, entre que l'auga clarejèt, l'ouficial de Magalouna, asseguet das conses, intrèt sans quincà mot dins la cambra reiala. Au bruch que faguèt la coumitiva, Pèire d'Aragoun creseguèt qu'acos èra lou segne de la Marca-Rosa qu'èra davalat subran dau pioch Sant-Loup pèr venjà soun ounou de marit, Pèire d'Aragoun arrapèt soun espasa.

— Segne Pèire, ié cridèt En de Verda-Fiolha, dau tems que lous conses alandavoun las fenèstras, segne rèi, arregardàs, siéuplèt, quanta èra à-nioch vosta acoulada.
— Ma fenna! Marià de Mount-Peliè! — s'esclamèt, embabouchit, lou rèi d'Aragoun. E dins un franc cacalàs apoundèt en parlant à de Verda-Fiolha tout trampelant e que lagremava de joia:
— Espousa egrègia!... mossen l'ouficial.

VI

E pressats couma de nòvis de se coungoustà d'una tala benurança, Pèire II e sa Marià s'en couriguèron nisà au castèl de Mira-Val.
N'en tournèron qu'una mesarla d'après.
Pèr prouclamà davans toutes aquesta bona finida, Pèire çai rintrèt dins la ciéutat mount-pelieirenca embé sa Marià d'assetous davans el sus soun chival.
Entre veire aquel espetacle, lou pople, dins lou desbord de soun alegrìa, arquetèt un chival de tèla que roumpliguèt de palha. Un jouvent l'escambarlèt en dansant, dau tems que d'autra jouinessa bailavoun la civada au chivalet.
E lou dansèron encara, lou chivalet, tres jours durant, lous galois Mount-Pelieirencs, quoura, dins lous nòus meses, nasquèt Jaume d'Aragoun — lou Counquistaire.

La Ciéutat libra

I

Lous douge conses e lous magistres de lèis, Guiraud e Gui, acoumpagnats de dech omes probes e sages de Mount-Peliè, seguèron reçachuts pèr Pèire II e sa fenna, Marià de Mount-Peliè, que se tenièn ras d'elles lou baile En de Bizànca e quauques chivaliès catalans.

— Segne Pèire, sou diguèt lou conse En de la Glèisa, à la vèlha dau jour soulènne ounte se vai d'à-founs counstituà, de la counsentida mutuala dau pople e de soun novèl segne, la Coumuna de Mount-Peliè, lous conses de la ciéutat vous pourgissoun lou salut de sous chivaliès, de sous bourgeses e de las sèt escalas de sous mestieirus. Deman se prouclamarà l'independència mount-pelieirenca; deman juraren toutes, vautres lous prumiès, Segne e Dona, juraren toutes de sempre respetà las coustumas e las franquesas que Mount-Peliè tèn das aujòus de dona Marià.

Lous cent vint-e-tres articles de nosta Charta coumunala soun l'obra dau libre judice, de la justìça e de l'esperiment das Guilhèm e de nostes paires. Coumpelissoun en tout pèr jurament, enaurant antau la founsuda bravetat de paraula de l'ome de Mount-Peliè. Encara quauque tems e veiren lou Libre de nosta Lèi coumpletat per lou Libre de nostes juraments...

— Noble segne, ajustèt lou magistre de lèi Gui, iéu soui un das disciples de Placentin e d'Azo. Me glourifique d'èstre iéu qu'ai escrich, aici meme, jouta lous iols de Placentin, la prumièra coupia de sa Souma dau Code e de sa Souma das Institutes. Estent qu'ai coulavourat embé voste baile En de Bizànca e lous conses En de la Glèisa, En Regord e En Aimeric à la redacioun de la Granda Charta, afourtisse nautament qu'aqueste cartabèu es empruntat de la doutrina dau famous legista.

Que de fes, nautres sous fidèles, avèn-ti pas ausit aquel grand magistre se meravilhà de l'ime de sapiència dau pople mount-pelieirenc e ben-astrugà de lou veire adralhà soun esperit dors l'art de las lèis e dors l'art de la fisica.

La Charta coumunala que promulgarès deman, segne Pèire, Larà de Mount-Peliè la ciéutat de la bona aculhença. Lous bastiments que desbarcoun à Latas, carrejoun pas soulament toutes las menas das prouduchs de las isclas, escampoun encara sus noste terraire las doutrinas experimentalas das Grecs e das Aràbis.

La Ciéutat de Mount-Peliè recata quau que siègue que i'arriva, mès souls, lous mount-pelieirencs, podoun apraticà lou gouvèr de soun counsulat eïssit dau pople. Lou segnou de Mount-Peliè n'es que lou reial gounfalouniè de nostas franquesas. E pèr defendre nosta terra de libertat abastoun las sèt escalas de nostes mestieirus!

Ah! que nàni, Mount-Peliè es pas lou mount pestelat ou lou mount claus que quauques-uns s'imaginoun d'atrouvè à l'encausa de soun noum. Es-ti pas, au countràri, dins sas parets de cench merletadas, fichadas de vint e cinq tourres e badant pèr douge portas e save pas quant de pourtalièiras, es-ti pas lou mount alandat e espitaliè?

— Dises vrai, sabentous magistre, respoundèt lou Rèi En Pèire. — E vautres, conses valents, vous cride que soui fièr de ma ciéutat mount-pelieirenca. Pèr demoustrà dau milhou que poudèn noste devouament à la causa publica, Maria e iéu noun soulament ié largan la Granda Charta, mès ioi encara, davans lou noutàri public de nosta Court, En Bernat de la Porta, déliéuran plen poudé as conses de la redimà chaca cop que devendrà utile as interèsses de la Coumuna, e aco-d'aquí sensa se counselhà de nautres, dins lou present e dins l'aveni.

II

Entre que campanejèt Nosta-Dona de las Taulas, la ciéutat se clafiguèt de joia. A l'entour de la glèisa, ajoucats sus las taulas voidas das cambiaires, las fennas e lous enfants esperavoun lou courtège segnourau. Una longa aclamacioun saludèt soun arrivada.

Precedats de la Court dau baile, Pèire e sa fenna Maria apareiguèron au mitan de las bandièiras de las sèt escalas e jouta un pavilhoun de drap d'escarlata tengut pèr quatre omes probes e sages.

Entre dintrà dins la glèisa, lou couble reial ausiguèt l'arenga dau prevost de Magalouna e dau retou de Mount-Pelieiret, — e lous douge conses majouraus, lous quatre conses de mar, lou conse de la bedocha e lou conse das aubarestiès l'enroudèron.

Drech au pèd de l'autar, lou conse das sediès aubourava un large estendard de seda à las armas de la Coumuna de Mount-Peliè: l'image de Nosta-Dona de las Taulas segnourejan sus l'escut d'argent das Guilhèms cargat d'un tourteau rouge, — armas simbolicas retrasant, dins l'ime de Guilhem V que las aviè creadas, lou Mount avoudat à la Vierja.

L'avesque Guilhaume d'Autignac bailèt la paraula au noutàri En Bernat de la Porta. Aqueste acoumencèt couma seguis la lectura de la Lèi escricha dins nosta lenga d'Oc:

“ Ad honor de Dyeu Jeshu Crist e de la Verges Maria, Mayre sieua, aysso son las costumas e las franquesas de Montpeylier...”

Acabada la lectura, Pèire e Maria s'enancèron davans lou prevost de Magalouna, Gui de Ventadour, que teniè sus sous brasses lou libre das Evangèlis. E lou fièr rèi d'Aragoun, segne de Mount-Peliè, e sa devota espousa, Maria de Mount-Peliè, jurèron respèt e fidèlitat à la Ciéutat libra.

Lous douge conses majouraus diguèron eles atabé lou jurament.

S'acabèt, la ceremouniè, dins una cridadissa d'alegrïa, e la courpouracioun dos aneliès, pèr sagelà l'uniment de l'oustau d'Aragoun e dau pople, oufriguèt à Pèire e à Maria ide poulidas annellas en argent de Mount-Peliè.

III

Aussat au coumoulun dau poudé, Pèire d'Aragoun voulountèt de se faire courounà à Rouma pèr lou Papa.

Un mati de novembre, una frapa de pople s'amoulounèt ras de la porta de Sant-Gèli pèr acoumpagnà de sous vots l'ufanous segne Pèire e sa seguencia mai que bella. Don Sancha, ounce dau rèi; l'archevesque d'Arle, Miquèu de Moriez; lou prevost de Magalouna, Gui de Ventadour; de barouns dau Roussilhoun, de segnous aragouneses escourtavoun lou rèi Pèire qu'aviè tengut à prendre dins sa coumitiva lous conses majouraus En de la Glèisa e En Pèire Lobet, sendic de la Coumuna.

La caravana s'acaminèt dors lou ribeirés prouvençau. Cinq galèras dau fraire de Pèire, En Anfos, comte de Prouvença, l'esperavoun. Embarquèron tout aquel mounde que trouvèron à Porto dous cents chivals de sella, mandats à sa rescontra pèr Innoucent III.

Quanta bella fèsta qu'aqueste sacre, ounte se vesié la rauba rouja das conses de Mount-Peliè vesinejà embé la pourpra das cardinals de Rouma! E noste brave Pèire, certa foça bragard e galinet, mès au founs bon catoulic, noste Pèire reçachèt das mans dau Papa de la Santa Glèisa e la courouna e la rnitra e la pouma e lou scètre reial e encara l'espasa de chivaliè...

E creirès-ti que la nioch d'après aquesta counsecracioun memourabla, quoura dourmissiè dins l'oustau das canounes, jouta l'aparament de la crous de Sant-Pèire, creirès-ti qu'à-lioga de pantais de glòria, Pèire d'Aragoun sounjèt un afrous regardadis?

La Terra d'Oc ounte mestrejavoun soun noum e lou de Ramoun èra caucada pèr de négri cavaucaire; de legats de la Court papala iè trasièn l'escoumenge à-n-el Pèire, e un baroun gravouge ié derrabant soun espasa de chivaliè, l'espasa pountificala, n'en pounchounava lou cor!

La Counquista suprèma

I

Entre qu'agèt cargat l'Aragoun e la Catalougna de soun poudé magnanime, entre qu'agèt counquistat lou reiaume de Maiorca e que vegèt que lou reiaume de Valença èra à mand de s'aclinà jouta sa lèi, Jaume Ie, oubrant pertout, aparèt l'aureilha dors lous païses de lenga d'Oc de la man das Pirenèus e ausiguèt lous plèntis e mèntis das sirventés das troubaires que s'escapavoun de l'arrouinacioun.

Era encara jouinet que pas que de legi lous pouèmas de Tomiès e de Palazis de Tarascoun cantant la delièurança de l'enfant de Pèire, aco abelugava dins sa tèsta lou sentiment de soun degut à respèt dau terraire esclavat que soun paire n'èra estat lou darniè espèr. E vejaici que las voueses venjairas de Bernat de Rovenhac e de Guilhèm de Montanhagol cridavoun, mestrejantas, que la glòria dau Counquistaire istariè esterla tant que noun sariè realisat l'afraïrament das poples occitans jouta l'aflat dau poudèrous oustau d'Aragoun.

Jaume, que tablava de ié respondre, s'embarquèt pèr Mount-Peliè dins l'estigança d'acampà, à soula fin de s'entendre toutes ensemble, lous segnes prouvençaus e lengadocians. Lou baile, lous conses, e cent bourgeses à chival l'esperavoun au port de Latas, ounte arrambèt la galèra reiala.

— Segués lou ben-vengut au mitan de nautres, cent mila cops couma lou bèu jour de Pascas! ié faguèroun dins soun parlà ninoi lous ouliès e lous estajans de la porta de la Saunariè que, lous prumiès, lou saludèroun.

— Coussi? sou cridèt En Jaume en se virant dau coustat de Don Fernandez de Azagra, lou rico home aragounés que se capitava à sa dèstra, “ Dequé m'aviè dich moun baile En Atbrand: Mount-Peliè vouliè s'insurjà contra iéu! E me pareis que la ciéutat me recassa couma soun enfant carrissime! ”

Lous meinadiès das cabalaires, Pèire Bonifaci — l'ome lou mai poutent de la vila, à la dicha de las crounicas, — e Guerau de la Barca avièn pamens partisounat l'oubrança de cadun das counjurats; avièn tout previst, franc de veire lou rèi En Jaume prendre pèd sus lou pople. Abastèt que lou Counquistaire se faguèsse veire dins l'espandiment de sa mascla bèutat pèr que lous Mount-Pelieirencs, meravilhats d'aquela flou de soun sang, s'afouguèssoun au desbord de soun leialisme embé d'alègras cridadissas!

Pèr se mai sarrà dau pople, Jaume demourèt dins l'oustau meme d'Atbrand. Une senmana pus tard, ié reçaçhèt Ramoun Berenguer, de Prouvença; Ramoun VII, de Toulousa; Amauric, viscomte de Narbouna; Trencavèl, de Béziès; lous comtes de Fouis de Coumenges, de Roudés e d'Armanhac.

La maja-part d'aquestes caps-mèstres occitans èroun aflanquits, demaucourats e sensa espèras. Tout-bèu-juste, se lous dous Ramouns s'endevenièn à la perfin de sas rivalitats.

II

Es antau que Mount-Peliè vegèt caupre, dins sas muralhas, lou grand acamp de nosta naciounalitat miejournala, à l'oura ounte ela n'èra quasiment à soun darniè badal.

Aubourant embé galhardiè davans toutes Tizò que lugreja, Tizò, sa nobla espasa de chivaliè, Tizò, lou tisoun abrandat qu'aviè escafarnat las manadas mouras de Ben-Zeian e abrasat tout ce que varalhejava contra la civilisacioun crestiana, — Tizò dins sas mans, En Jaume s'esclamèt:

— “ Dins aquesta ciéutat de Mount-Peliè aparada de la desaviadura pèr sa Vierja de las Taulas e soun esperit d'independéncia; dins aquesta ciéutadella de libertat que lous barbares dau Nord an espargnada en mitan de nosta terra chaupida, lous cors podoun se couflà d'espèrs. La Glèisa a matat l'eresia: à nautres, ara, es de roumpre lou vanc das caucaires alabres que cercoun de nous gimblà l'esquina. Moun paire, que de soun tems lou sounavoun Pèire lou Catoulic, moun paire noun èra mantenent de l'eresia. Quoura aparava vosta Raça, segnes fraïres, s'entanchava que de faire aventà soun ideau poulitic: lous païses de lenga d'Oc units e enliassats, pèr faire flòri, jouta lou gouvèr das princes de soun oustau.

— Faguèt-ti pas plan de tout, avans Muret, amor d'acertà lou triounfe pacific de la Glèisa? L'avès-ti pas vist, aici même, mejanciè entre Ramoun de Toulousa e lous legats pountificaus?

— Pèr gardà vosta naciounalitat, pèr sauvà vosta Raça, me pourgiguèt iéu-meme, enfantounet, en testimòni d'apasiment, à l'oura ounte, m'afiançant à la manideta de Simoun de Mount-Fort, me boutèt entre las mans d'aquel roudrigue menèbre, à la granda désesperança de ma maire que, pioi après, pecaïre, ablasigada pèr l'amarun e lou malan, anèt se recatà contra lou Papa.

” Couma demoustrèt soun bon judice, moun brave pople de Mount-Peliè, tant catoulic, lou jour que, destrian mai que bèn la Glèisa dau partit das barouns dau Nord, coussejèt en defora de la ciéutat Simoun de Mount-Fort que, de dessoutoun, èra vengut saludà lous avesques de la Crousada acampats dins la glèisa de Nosta-Dona de las Taulas.

” Mès parlen pas pus dau passat. S'agis d'escaboulhà l'auriscle, d'esvartà la magagna, de recabalà vostas vilas, de manteni vosta lenga. Pèr dona Maria la Santa, ma maire mista que dourmis soun som eterne jouta lous bards de Sant-Pèire de Rouma, ounte, à ce que se dis, soun cors miracleja, pèr ma maire, Maria de Mount-Peliè, jure d'acertà la respelida das païses de lenga d'Oc embé lou trelum de sa civilisacioun!

— Afrairàs-vous, enliassàs-vous, segnes esquichats, unissès-vous à iéu pèr lou bonur de vostes poples! Diéu aima lous rèis qu'aimoun sous poples! Alerta! Alerta!

— Nàni, Jaume noun jai antau qu'hou crida lou troubaire Bernat de Rovenhac; Jaume, au countràri, ista drech embè sa fisabla Tizò, la nobla mouilhè de soun cor batalhaire. Encara un pauc, troubaire, e pourràs pas pus dire en parlant de iéu:

— Tant qu'aurà pas fach pagà caramente la mort de soun paire noun pot gaire valé. ”

Ai counquistat quatre reiaumes, ai bastit mai de quinze cents glèisas, ai dità de lèis, ai fach cabussà lous Maugrabins, ai escrapouchinat sas rustas manadas. Pèr iéu a pas encara picat l'oura de l'escabour: pèr Tizò e embé Tizò remoutarai la naciounalitat occitana jouta lous paus d'or e de rouge de l'estendard d'Aragoun, — aco sarà ma majoura, ma suprèma counquista!...

Lou divendres d'après la restountida d'aquel rampèu patrioutic “ lou sourel mouriguèt, à Mount-Peliè, entre miejour e l'oura de nonas, disoun lous vièls pergamis e, escriéu En Jaume el-meme dins sa crounica catalana: se poudiè veire set estellas au cièl. ”...

Seguèt-ti, aquel esclüssi, lou simbèu de la fin finala de nosta naciounalitat occitana, — e las sèt estellas seguèroun-ti pas, elas atabé, lou simbèu precursou das sèt felibres de Font-Segugna, aqueles que sèt cents ans d'après avièn de faire reflouri nosta lenga d'Oc?

III

Era escrich que noste Jaume agantariè pas jamai la suprèma, la majoura counquista. Mount-Peliè èra de deveni ciéutat de França. E couma pèr coulà un bon vi cau d'aramouns, de cinsaus e de carignans, de meme pèr mountà una França forta èra de-besoun de Nourmands, de Bretouns, de Bourguignouns, de Prouvençaus e de Lengadoucians.

Mès sarà eternament ta glòria, o Mount-Peliè, — e pamens n'i'a tant que voloun pas hou saupre — sarà ta glòria d'avedre vist toun enfant reial, qu'èra de mouri dins la rauba de bourràs das mounjes de Citéus, d'avedre vist toun Jaume, lou pus famous capitani de soun tems, de l'avedre vist pantaisà dins tas parets, assoustadas pèr la fe, l'indépendéncia de nosta Raça de lenga d'Oc.

Lou Calignaire de la Negra

Lous cataus de la Ciéutat se quichavoun tout autour dau courous escoulan Pèire de Canet, l'enfant d'En Ramoun Canet, lou mai marcant das espourtaires de verdet, aquel que sous bastiments avièn visitat lous ports majouraus de la Mediterranèa.

Un das prumiès à Mount-Peliè, Pèire de Canet estudiava la medecina jouta lou mestrige d'Arnaud de Vila-Nova, de Guillaume de Bressa e de Jan d'Alès. Aqueles grands magistres afourtissièn que sariè el que ié sucedariè dins l'aliçounat de soun art.

Embé sous dous amics Jan de Roc e Pau de Banièiras, que ié fasièn l'acoumpagnada, Pèire de Canet intrèt dins la glèisa Nosta-Dona de las Taulas qu'èra aquí, qu'à l'ourdinari, alargariè davans toutes lou prouvament de sas dos tèsis dichas das pounts rigourouses.

De miejour à quatre ouras, lou candidat à la licènci de medecina argumentèt sabentament e reaçachèt das mans dau president de la jurada, l'avesque de Magalouna, Jan de Coumenges, l'encartament ouficial. Mès toutes las fourmalitats publicas de l'eisamen noun èroun encara coumplidas. A la fin de la senmana, venguèt lou moument de subi las triduanas, valent à dire una tièira de tres interrogaments.

Lou quatrième jour, enfin, sempre escourtat de sous parents, de sous amics e de soun acourdada, la belugueta Fourcanda de Bouca-d'Or, s'enanèt à la glèisa Sant-Fermi, parròquia de l'Escola de la medecina, pèr revesti lous entre-signes de soun nouvèl titre. Arnaud de Vila-Nova ié carguèt la bouneta negra de drap, la floucada de seda cremesina e la cenchà daurada, enfin ié boutèt au det l'anella d'or.

Lou nouvèl licencié doubriguèt davans l'assemblada lou Libre d'Ipoucrata e s'espacèt au mitan dau mounde en oufriguèt à toutes lous qu'èroun venguts ounourà de sa persouna soun Ate de triounfe de dragèias, de frucha coundida e de gants embaumats.

Quand s'atrôvèroun defora de la glèisa, Pèire de Canet counvidèt sous amics à veni à soun mas, en riba de Maussou, pèr s'ataulà à las repetilhas frairalas de la licènci. Mai que galois, toutes respoudèroun que oi, e dau tems qu'anavoun escambarlà sous chivals, Jan de Roc, en bailant la brassada à Pèire de Canet, se desencusèt, soulet, de pas segui la cola.

— Siès sempre lou meme, ié respoundèt l'eros de la fèsta, en lou sarrant sus soun pitre; soulide que t'envàs encara passà tèms as pèses de ta Dona, bèu calignaire de la Negra!

II

Jan de Roc s'esquifant au mitan das bourgeses e das mestieirus qu'arrivavoun de tout caire amor de benastrugà, eles atabé, soun amic, enrenguèt quaucas carrièiras e dintrèt dins la glèisa de las Taulas. S'aboucant davans l'estatua venerabla de la Vierja à la Cadièira, la Vierja assetada e recatant contra soun cor l'Enfant divin, el s'entanchèt à-n-un gros travail de tèsta. Creseguèt sute que la Vierja s'avivava e que ié parlava:

— Tu siès, ela sou disiè, o moun Roc, lou mai afeciounat de mous enfants. Desempioi Guilhèm VI, qu'es el que me carrejèt de Palestina, desempioi Adrian IV, lou papa mount-pelieirenc, couma lou sounavoun aici, desempioi Adrian IV, que venguèt clinà sa tiara davans moun Antica Majestat, degus, oi degus, m'a pas aimat couma tus.

Guilhèm VI a vougut que segnourejèsse sus soun pople de Mount-Peliè — e jout moun aflat el es devengut lou pious ascetic de Grand-Sèlva.

Enfant d'un mendicant anglés e mendicant el-meme, Nicoulas Brakespeare, desbarcat à Magalouna d'un bastiment mercandiè, me fisèt aici las butadas de soun ama apoustoulica — e jout moun aflat el es devengut diacre de Sant-Jaques de Melguel, canounge de Sant-Ruf d'Avignoun, avesque, pountife soubeiran, l'Adrian IV qu'a fa reflouri lous Estats de la Glèisa.

Siès tus, o moun Roc, après eles, lou mai fidèle entre mous fidèles. Toun paire, un das tres zelouses patrouns de moun culte, e ta maire, la douça Liberia, t'an voudat à iéu. De-que pourrai faire pèr tus, ara qu'es à iéu? Escouta:

Siès en chancellà pèr lou causiment d'un estat. Couma Pèire de Canet auriès l'idèia de soulajà lou mau das gents, mès, te fisant mai qu'el dins lou secous d'amount, despartisses sensa calama de paraulas de soulàs e d'espèr à lous que reboullissoun d'una michata rêva e as adoulentits de la malautièira Sant-Lazari, à Castel-Nòu; passes las niochs à la testièira das aliechats de l'espitau dau Sant-Esperit e siès devengut lou segoundari ple d'ardersa de l'ermita Gautiè-Coumpagna à l'espitau das roumiéus.

Sourtisses de la retirada dau souffriment que pèr veni toumbà d'à-ginouls davans iéu. Tous iols s'aluminoun quand bades moun estatua de boi negre que luis, e couma aco te reviscoula d'alènà lou parfum qu'ela escampa e qu'atroves, sou dises, força siau e tras-que galant. Tout lou mounde d'aici, atabé, t'escais-nouma lou caste calignaire de la Negra de la bona sentida.

M'aimes, iéu, la Negra que sentisse qu'embaume. Aco's pas prou. Vole que lèu devèngues lou choucard d'una altra Negra. Oi, t'hou coumande: l'aimaràs aquela Negra que pudis qu'empouisouna, la Pèsta, l'orra Pèsta Negra. Aimaràs sas vitimas, las coustesiràs e se mourrissoun, las entarraràs. Acoussa-te à ta missioun tant flama, à l'Ate de trioune que t'alestisse! Acoussa-te dors ta novella ben-aimada, noble calignaire de la Negra!...

III

E lou cap-de-jouvent Roc de Mount-Peliè, arrapant lou bourdoun de roumiéu, gagnèt l'Italia ounte maliciava la pèsta. Lou vejaici à Aquapendente, à Cesena, à Rimini, à Rouma, à Plaisença; es devengut l'assoustaire e lou devouciou chivaliè de lous que la Negra Pèsta aganta e pounis de sous fissous.

La Negra afrousa l'aima pioi el-meme e l'apoustemis. Adounc, ple de lassige, s'entorna en penequant à Mount-Peliè, qu'enveja pas pus qu'una causa: alena un darniè cop la sentida força siava e tras-que galanta de la Vierja Negra de las Taulas. Mès dins la desvariada d'aqueles tems, l'arregardoun couma un espioun, l'arrèstoun à Mount-Peliè meme e çai mouris en carce...

IV

Mentretan, Nosta-Dama de Mount-Peliè, aquesta annada dau mouriment de Roc, miraclejèt superbament: l'argentiè Simoun Rainaud, atacat d'un cranc, se sanèt pèr soun intercessioun. A soula fin de ié marcà sa recounouissença pertoucanta, Rainaud gaubejèt la pratica de soun art e l'adrechariè de

sas mans à ciselà una estatua de la Vierja à la Cadièira, d'argent prum daurat, adournada de peirariès e de perlas mai que bellas mountadas d'or, dau pes de douge liéuras.
E à cha pau, aquesta estatua de l'orfèbre prenguèt la plaça, dins lou ceremòni dau culte, de l'estatua de boi negre de Guilhèm VI — couma se la Vierja de las Taulas vouliè pas pus èstre la Negra de la bona sentida que pèr soun fidèle sant Roc.

La Porta d'Or

I

Que n'èra un traficair afrountat aquel En Pèire Teric, conce sus mar de la ciéutat de Mount-Peliè, que sa founcioun èra de bailejà dins las Escalas levantesas las naus e las galèias mount-pelieirencas! Èra be, el, lou rèi dau port de Latas: couma s'entendiè mai que ben embé lou mounde dau negòci de Pisa, de Gènas e de la Catalougna e de Maiorca aviè mountat de countadous mount-pelieirencs dins toutes lous ports de la Mediterragna. Lous conses de mar, acampats dins la Loja das mercadiès, i'avièn fisat lou drech d'amagestrà de tratats de coumerce e de rejoinchas maritimas; s'èra requitat embé maja reüssida d'una missioun d'affaires contra lou prince d'Antiocha e, gramecis el, Mount-Peliè aviè d'èstre fièr d'entretenì l'acòrdi pachat embé lou rèi de Maroc, Abolchaçan-Ali.

Car dins aqueles tems d'enavans espetaclous e de magnifica prouducioun, Mount-Peliè èra lou prumiè port de la Gaula, pèr Latas, sus la Mediterragna. Sas naus carrejavoun à Chipre, à Rodes, à Bizànci, à n-Alessandria, à Tunis, dins tout l'Orient, amai en Afrìca, amai en Asìa, las banastariès de nostes panieiraires, lous vis de Lengadoc, lous òlis de Prouvença, lous blats de Toulousa, lous verdets, lous draps, las ciras e las candelas de Mount-Peliè, lous muscats de Lunèl e de Frountignan, lou mèu de Narbouna, etc., etc.

A ran de la Loja, l'archimbella pesava nioch e jour e sensa relàmbi, e sus lous tauliès das cambiaires, en renguèira ras de la glèisa de las Taulas, s'amoulounavoun, emblaussissents ou cargats de poussa negra pastada pèr lous dets, lous deniès e lous sòpus mauguoulencs, la mounedassa d'argent dau rèi En Jaume, lous maraboutins, lous sòus tourneses, lous blancs, las parpaiolas, las dardenas, lous sòus reiaus e lous sequins e lous flourins e lous moutous d'or; e dins aquela mescladissa de pèças d'or, d'argent, de couire, d'estam e d'arquemià s'arremarcava la mouneda especiala dau coumerce de Mount-Peliè embé soun escrich maumetan.

De Grecs, de Jasiòus, d'Aràbis, de Pisans, de Tors, barralavoun pèr carrièiras, nostas carrièiras destrechadas e escalantas ounte, dins un councert estrange, s'ausissiè toutes las lengas de la terra mestrejadas pèr la resclanticla brusissenta de noste parla d'Oc que bailejava lous ordres e ourdounançava las coundiciouns de venda e de croma.

D'embassadous dau rèi de Tunis, de princes Turcs fasièn visita à nostes conses e oufrissièn à la Coumuna de presents magnifics. De troubaires toucavoun l'aubada à las farotas Venicianas que lous patrouns de las galèias fourestieiras avièn embarcadas, davans sa partença, pèr lous agraments de la tavessada e, qu'aici, se n'en coungoustava la jouinessa de las Escolas.

E au rambal, au vai-e-torna, au tran-tran sensa fin finala de tout aquel mounde en varal cau apoundre lou bruch e l'ativetat dau carrejage de las mercaderias de Mount-Peliè à Latas ou de Latas à Mount-Peliè per de de centenats e de centenats d'atalages de sièis ou ioch chivals sensa countà lou bardot; — l'escourtada saganousa das escoulans de la medecina s'engulhant dors Sant-Fermi pèr lous Ates de triounfe e las proucessiouns publicas de devoucioun à Nosta-Dona de las Taulas.

E pioi encara, à diversas pountanadas, çai toumbavoun las grandas jornadas istouricas dau veniment das papas desbarcats à

Magalouna; — e la foga asoundanta d'un emir sarrasin que se trais as pèses d'Alessandre III pèr poutounèjà sa mula e que s'auboura en l'alengant dins soun charabiat que tant-lèu esclargis un interprète; — e l'intrada vitouriala d'Urban V, çai tournant pountife soubeiran, dins la ciéutat meme ounte, vint ans peravans, simple magistre, enseignava lou drech!

Quanta festejada sempre memourabla qu'aquela intrada d'Urban V! Un long ajust de mounde ourlava lou cami de Nimes, dempioi lous bàrris fin qu'au pont de Castèl-Nòu. E quoura pareiguèt lou papa, emb'una escourtada tout ple superba, las ridadissas de gau acatèroun lou balin-balan de las campanas.

En cap, las courpouraciouns embé

sus bandièiras, pioi lous ouficiès reiaus embé Felipe de Lantilha e Colin Bertrand liocs-tenents dau rèi de França à Mount-Peliè; enfin de cardinals embé Gui de Bolougna, decan dau Sacrat-Coulège.

Urban V, achivalat, caminava jouta un pàli de drap d'or que lous bastous d'argent n'èroun pourtats pèr ioch das conses, dau tems que lou prumiè conse, Pèire Pelegrin, en rauba rouja, couifat dau capeiroun negre, teniè la caussana dau destriè pountificau...

Una jornada de fèsta seguissiè d'autras jornadas de fèstas: Urban V sacrava soulennament la capella dau mounastiè Sant-Benezet — devenguda, dins la seguida das tems, nosta basilica-catedrala — e inagurava lou Coulège de Mende, lou Coulège das douge mèges que, à sas despensas d'el Urban V, se ié fasiè l'entretenença, dau tems qu'estudiavoun aici la rnedecina, de douge estudiants sourtits dau dioucese de Mende, païs nadalenc dau grand papa.

Un autre cop, aco's èra l'abord, dins nostas parets, de quatre rèis e de sas courts: Filipe VI, de França; Jan l'Avugle, de Bouèmi; Pèire lou Ceremounious, d'Aragoun; Jaume III, de Maiorca, e touta una serià d'ajustas à chival en soun ounou.

Tant-lèu acabats lous festenaus, lou traficage dau coumerce recoupava, enanciè mai-que-mai. Cade mati s'empartissièn en tira-longa dors Avignoun, dors Lioun, dors Paris, dors Toulousa de carradas de velous, de tafatà e de fièusses d'or prim de Lucas e de Gènas; de frucha de las isclas, d'iranges de Maiorca, de limounas counfidas, de ploumas d'estrùci, d'anisses de Valença, de cira de Barbaria, de sucre de Cande — e d'aucèls de Chipra, — e de pebre e de canella e de gengibre, que las naus de Mount-Peliè dintravoun sus lou countinent pèr la Porta d'Oc, — antau s'escais-noumava, d'aquel tems, lou barcarés de Mount-Peliè.

Imaginàs-vous touta aquela foula d'estudiants, de mèstres, de travalhaires, de carrejaires, de carretiès e de mercadiès, touta aquela foula gargoulhanta e engauchida, touta mena de mounde e de bèstias de tira, e digàs-me, siéuplèt, s'avièn pas lou drech de s'enarcà d'èstre mount-pelieirencs nostes bons aujòus de l'Age-mejan, dau tems que s'ausissiè la campana publica e qu'amount, au pounchoun dau bèl oustau nòu dau Counsulat, l'estendard comunau, blanc e rouge, floutejava sus una ciéutat fièra e poudèrousa!

Era-ti pas l'epoca que lou titoulet, mai que ben pourtat, de bourgès de Mount-Peliè se croumpava quatre mila flourins pèr dous richissimes mercadiès de Flourença?

Era-ti pas lou moument que l'or de Mount-Peliè lusissiè, fameux, autant dins lous païses d'Oïl que dins lous païses d'Oc, e que la lenga francimanda, bretonnejanta, disiè dins un pouèma:

“ N'en prendroie tot l'or qui soit à Montpeiller? ”

Espantàs-vous, après aïço, que quand Mount-Peliè seguèt encourpouat au reiaume de França, rèis, liocs-tenents reiaus e ouficiès de las talhas ou de las gabellas ajoun prelevat imposts sus talhas e talhas sus dèimes, meme à l'oura dau tremount d'aquela prousperitat — dins la bourroula generala de l'Europa.

E tant leialament franceses èroun devenguts lous Mount-Pelieirencs que pagavoun à boursa alandada. Couma l'argent deveniè rare — lou rèi Jan èra alor prisouniè das Angleses — las bellas Mount-Pelieirencas oufriguèroun sas daurèias pèr la deliéurança dau soubèiran, dau tems que lous Mount-Pelieirencs ié mandèroun de vî de nostas baissas. Lou rèi Jan n'en vendèt as Angleses e couma aquestes, agroumandits, n'en redemandavoun, lou mounarca presouniè faguèt veni de carradas de boutas.

II

Çai davala enfin Jaques-Cor. Lou vejaici visitaire general de las gabellas en Lengadoc. Fai passà las coumunas au regalet, fai prelevage de coumessiouns sus toutes lous travals publics, sus toutes lous affaires d'interèt generau; manlèva e presta, — presta au rèi, à la court. Couma sembla qu'aquel ome poutent vai tournà faire trelusi lou coumerce maritime, la Ciéutat sensa coumtà, sensa arresounà, sensa marcandèjà paga à Mounseigne l'Argentiè tout ce qu'eisigis.

Es que Jaques-Cor s'ermessa aici prince dau negòci internaciounau. Es que, cade jour, çai arrivoun pèr el, de milhassadas de quinaus de las milhounas prouduciouns industrialas dau reiaume. Lous entrepaus dau mas d'En Civada, proche de Latas, apasturats pèr mai de tres cents countadous despartits sus lous territòris de toutas las prouvinças francesas, refoufoun de boutas, de gerlas, de sacas, de coufins, de faisses, de bourrassas, e de caissas de touta mena de causas.

Lou capitani mount-pelieirenc das mercadiès de França à las fièiras de Champagna e de Brîa s'envai faire croma fin-qu'en Flandra, fin-qu'au Brabant!

Lous fustages das orles roudanencs, à Bèu-Caire, soun clafits d'oubriès qu'alestissoun las barcassas e las galiotas pèr lou transit de las mercadèrias dau port de Latas, à travès lous estangs, à la mar ou, pèr lou canau de la Radella, dors Aigas-Mortas — qu'aquel port es devengut, dempioi lou reinage de Sant Louis, lou barcarés de Mount-Peliè.

Patroun Guillaume Gimart sus la galèia Sant Miquèu e patroun Jan Fourèst sus la galèia Sant-Jaques avaroun pèr anà esparpilha aquelas mercaderias dins lou Levant, dau tems que, pèr la galèia Madalena, patroun Jan de Vilages, e pèr la galèia Sant-Denis, patroun Galhardet de Farges fan dintrà en França, pèr la porta d'Oc, tapisseries d'Orient, eisinas d'or, pèiras precieuses, metals de valou, armas de lùssi, — pebres e espècis — òulous e perfums que Guillaume de Varie, intendent de Jaques-Cor e ciéutadin de Bourges, couma soun mèstre, acantouna dins lous quatre oustaus que l'Argentiè poussedis à Mount-Peliè e dins tres autres, encara mai grandasses, qu'a pres à renda.

— Es una porta d'Or qu'aquela porta d'Oc — diguèt un jour Antòni Negre, lou prumiè coumis das entrepaus que, ravoï, surveilhava un débarcage d'estofas tunisianas.

— Sèn en trin de faire de Mount-Peliè un mount de richessas, un mount de drudige, — respoundèt Guillaume de Varie...

Mès d'un negòci tant espetaculous soul aproufitet Jaques-lou-Rabaiaire!...

III

Tant ben e de tout traficavoun lous Mount-Pelieirencs qu'agèroun l'estec de se faire traficaires de car umana. Croumperoun de bellas esclavas turquesas, mouras, tartaras e las revendèroun embé benefice. Anèsses pas creire, pamens, que las matrassèroun ou que seguèroun catiéus à soun respèt.

Lou pebrié En Bernat Engilbert rintrèt d'una crousièira emb'una Tartara jouineta qu'intéressèt dins soun negòci e que maridèt, pauc d'après, en ié dounant verquièira, à Jan de Sant-Pous, coutilhouniè à Bourges. L'aviè aquistada pèr dos cargadas de cassounada. En Jan de Serrièiras, un das pus grosses mercadiès endrudits de la carrièira Bouca-d'Or, croumpèt en Turquia, pèr quauques pessucs d'or, la saura Caracassa que n'en faguèt la serviciala especiala de sa filha Guilhaumeta, qu'ela n'en devenguèt l'amiga carrissima.

A soun arrivada à Mount-Peliè, Caracassa aviè recoundut dins las manchas larjas de sa rauba verda tres pichotas bouitas clausas d'à-founs. Las doubriguèt que lou jour dau maridage de Guilhaumeta. Seguèt, aco, lou mai agradabla das presents de noça. Una bouita teniè un flascoulet d'aiga de rosa de Damàs; la segounda estremava de l'“ henné ”; un autre flascoulet parava la tresième: èra de nard.

Es d'aquel jour que las donas de Mount-Peliè abenant das perfums e das enguents de teleta de las Levantesas devenguèroun toutas farotas e s'acertèroun las aujolas lisquetas de nostas galantas grisetas.

Lou Rèi dau Papagai

Carles VII perseguissiè dins las majouralas prouvincias dau reiaume lou viage que sa toca èra d'amourteirà l'unitat francesa.

S'endevenguèt qu'èra Pascas flouridas lou bèu jour qu'intrèt soulennament à Mount-Peliè! Lous conses i'astruguèroun ben-venguda au rode meme que, nòu ans davans, lou mandadou de Jana d'Arc aviè aduch au pople mount-Pelieirenc las bonas nouvelles de la delièurança d'Ourleaus.

Carles èra encéuclat de noumbrouses chivaliès e d'una coumpagnie d'elèi d'omes d'armas que mai d'un s'èra abatalhat jouta lou gouvèr de la Piéucella. Delarguèroun sa gau de se capità dins la ciéutat que i'aviè mandat, à la passada dau sèti d'Ourleaus, biassa e municions.

Un vièl capitani enartèt davans toutes, à Carles VII, la valentiè d'un arquiè mount-pelieirenc qu'aviè estrambourdat, à-n-Ourleaus, e La Hira e Xintralhas.

Lou rèi demandèt as conses de ié presentà aquel arquiè s'èra encara viéu.

— Petrequin Dascamps, respoundèroun lous conses, déu tirà lou papagai en voste ounou, Sire, deman mati, dins lous valats de la vila.

Sounèroun Dascamps. Era un ome arrapat, d'una bella aussada e d'una cara ferouja.

— Quau siès tus, valent arquiè? interroguèt Carles.

— Soui l'enfant dau serjant de la mala nioch.

— Dequé vòu dire aïço?

Avans d'entemenà, Dascamps regachèt lous conses. Au sinne de l'un d'elles descabedelèt soun recit:

— Moun paire, Ramoun Dascamps, un das serjants de La Coumuna de Mount-Peliè, se boutèt cap de cola das omes qu'auvetèroun davans la tirania dau duque d'Anjou, lioc-tenant dau rèi e esquicha-paures.

— Jouta lou règne de Carles V?

— Hou avès dich, Sire. Lou duque d'Anjou aclapava de talhas las gents de Mount-Peliè. Emb'el grelhavoun dèimes e abusages à-n-una pountanada que lou coumerce mount-pelieirenc, adejà prou despouderat, mainava talament qu'aviè pas pus de salida tant èra grand lou malastre en França.

Moun paire arreçachèt das aubarestiès de la Coumuna la missioun de pourtà au duque d'Anjou lou plagnun de sa courpouracioun. Una coumissioun de las talhas çai venguèt enquestà, mès couma semblava à toutes que vouliè restà sourda à las suplicaciouns d'un pople que, pèr el, lou patiment èra quicon de nòu, l'ira petèt, terribla, crudèla. Dins la nioch — lous coumissàris de las talhas seguèroun agarrits e escoutelats. Moun paire èra de la cola das descadaires.

Lou duque d'Anjou aimava pas Mount-Peliè. Aviè ensajat, peravans, de soustraire nosta Coumuna à la juridicioun dau rèi de França, ce qu'aviè fach clantì la proutèsta dau COUNSULAT.

La repressioun dau treboulèri sourtit de l'abus de las talhas seguèt pèr el l'oucasoun de descausanà sa ressentida. Seguèt despietados que noun sai. Soun delegat, lou magistre de lèis Bernat Flamenqui, escourtat d'un ajust de troupas reialas, ourdounèt de quilhà un chafaud au mitan dau pont-levadis de la porta de la Saunariè. Davans lou pople amoulounat legiguèt una sentença averant la cièutat fautibla de lèsa-majestat e jujant au capital sièis cents Mount-Pelieirencs pèr l'encausa d'aquela sedicioun.

Dous cents èroun d'èstre penjats, dous cents èroun d'èstre cremats e dous cents èroun d'èstre passats au fièu de l'espasa. Despart d'aco, la Coumuna èra de pagà una indannitat de sièis cent mila francs e de desmantelà sas tourres e sas parets sus l'aloungada das bàrris que s'espandissiè de la porta de Sant-Gèli à la porta de la Saunariè e de deli, embé la campana dau COUNSULAT, lou drech de noumà lous conses, — judice espaventous qu'entirava l'avaliment de las forças vivas de la cièutat.

Lous conses e lou pople n'en cridèroun apèl à Rouma. A la preguièira de noste grand amic lou cardinal Anglic Grimoard, fraire dau papa defuntat Urban V, lou papa Clement VII seguèt d'entremessa. Lou duque d'Anjou voulountèt soulament l'eisecucioun das principaus coupables e lou pagament de l'indannitat arrestada, mès redeimèt lou COUNSULAT d'un tal biais que se pot dire que la mala nioch seguèt l'acabada de nosta independença coumunala.

Ramoun Dascamps, moun paire, s'entanchèt de fugida pèr escapà au bourrèl. Se recatèt dins las mountagnas de las Cevenas ounte ma maire, me carrejant dins sous brasses (alor n'ère qu'un enfantou à la muda) pouguèt lou rejougne.

Quinge ans durant assauvagiguèt sa vida en païs raiòu e, quand devenguère jouvent, engaubièt dins l'apratigage de la cassa lou biaissous arquiè que disoun, lou mounde, que soui devengut.

Ome fach, soui dintrèt à Mount-Peliè e quoura nostes conses decretèroun de mandà à Jana d'Arc un carré de secous, eles m'en fisèroun lou gouvèr. Sire, savès lou rèsta...

— Voudrièi, pamens, l'ausi de ta bouca.

Lous conses m'avièn dich:

— Dau tems qu'amount lous omes de tras la Lèira, couma lous de Paris, pachejoun embé lous Angleses, lou devé das omes de lenga d'Oc es de se sarrà contra lou rèi de França. Vai faire l'acoumpagnada fin-qu'à-n-Ourleas à las ajudas que la cièutat de Mount-Peliè pourgis à l'armada de França.

— Me soui acaminat, e lou carré es avengut à destinacioun sensa destourbe. Mes aquel traval de fourrié entrasie qu'à mièja à moun estec guerriè. E quand ai vist tant d'omes de lenga d'Oc dins l'armada de Jana, quand ai ausit sous milhous capitànis, La Hira e lou comte de Clar-Mount, enfants de nosta païs d'Oc, coumandà l'assalida dins la lenga nostra, me soui dich:

— Ta plaça es aici pèr tustà e tabassà lous Angleses ". Ai demandat alor e m'an acourdat de batalhà au coustat de La Hira. Ai tabassat couma moun paire m'a après à tabassà, e quoura lou messagiè de Jana çai pourtèt aici las bonas novellas de la vitòria, pouguèt tamben faire assaupre que lous omes de Mount-Peliè se venjoun das manjaments d'un duque d'Anjou en ajudant lou trioune de las armas dau rèi de França!

II

Carles e sa court assistèroun au festenau dau Joc de l'Arc. Lous arquiès afustavoun un parrouquet de boi pintrat de verd, lou papagai, tancat à l'orle d'un aubre. Petrequin Dascamps ié despleguèt soun adrechariè tant renoumada.

Carles VII, enfioucat, coumandèt d'escrèure soun noum dins lous pergams de la noublessa de França, dau tems que lous chivaliès e lous ouficiès dau Joc prouclamavoun Dascamps rèi dau papagai.

D'aquel jour, e pèr glourificà Dascamps, lous arquiès reçachèroun dins sous eisercices lous sòuls mount-pelieirencs d'ourgina nobla e prenguèroun lou titoul de chivaliès dau noble Joc de l'Arc.

L'Ort de las Scienças

Mèste Francés s'èra atardivat à jaquetà embé lous travalhados que s'amoulounavoun sus la plaça das Cevenòs. Çai ié veniè mai d'un cop à soula fin d'acampà dins la charradissa pau abourgalida d'aqueles gavachs, davalats à Mount-Peliè pèr lougà sous brasses, foça mots de lenga d'Oc tout ple granats, que, pus tard, èra de faire grelhà, acoutrats à la francimanda, dins soun Gargantuà e dins soun Pantagruel.

Abitèt à la glèisa Sant-Fermi tout-bèu-juste pèr mesclà soun amistados cop de poung à lous que sous cambaradas empegavoun, à l'acoustumada, sus la bouneta dau nouvèl doutou de la medecina que sourtissiè de la ceremouniè de soun Ate de trioune, — manèira galoia de i'enfousa fin-qu'à las aureshas l'entre-signe capital de soun grade.

Rabelais s'ajustèt à l'escourtada dau disciple d'Esculapa e la banda gaujousa clavèt aquela jornada de fèsta pèr un rebòbi farfassut, servit à l'aubergariè de la Crous, ounte venguèt s'assetà à la bona, ras de mèste Francés soun amic, Guillaume de Lauselergues, segne de Candilhargues, general de la Justia e de las Ajudas en Lengadoc, que Rabelais n'èra l'oste dau tems de sa segonda passada à Mount-Peliè.

Lous vis de Mira-Vau, de Canta-Perdris e de Frountignan regounflèron l'estrambord: lous brindes gisclèron, acoumpagnats de racontes afiscants e de galejadas petradas.

Rabelais ramentèt que sèt ans davans aviè jougat embé sous vièls amics Antòni Saporta, Gui Bouguè, Bautasar Nougè, Toullet, Jan Quentin, Francés Roubinet e Jan Perdré La mourala coumèdi de lou qu'aviè 'spousat una fenna muta, davans lous bourgeses e lou poble de Mount-Peliè embalausits.

— Dins l'issam das badaires dau pouplàs, sou diguèt, se vesie las rasclairas de verdet de las fabricas das faus-bourgs e me sembla qu'ai encara davans mous iols sas mans rouvilhadas de verd clapetant embé fernetega en l'ounou das escoulans-atous.

II

Guillaume Pelliciè, prumiè avesque de Mount-Peliè, e Francés Rabelais s'emblaissavoun d'establi lou catalogue das dous cents oubrages ou manuscrits grecs que Pelliciè veniè de n'endrudi soun immensa bibliotèca episcopala. Pelliciè fiolhetejava emb'una atencioun jalousa lous precieuses documents ourientals qu'aviè recampats dau tems qu'el èra embassadou dau rèi de França à Venisa e que pèr lous acipà aviè pas landejat d'engajà sa crossa pastourala.

— Quantas bellas plantas, — s'escrièt — pèr l'Ort risent de las Scienças, que sabèn toutes qu'es antau qu'Urban V noumava Mount-Peliè la sabentousa. Fontanablèu n'en recassa dous cents de mai, mès ai fach bona tria: Mount-Peliè a la chanuia.

— Embé de pariès tresors, — respoundèt Rabelais, — lous qu'estudioun, lous lauraires de la Sapiença, pèr parlà couma lou papa Nicoulau IV, atrouvaran aici un camp drud.

— Faren de Mount-Peliè un mount de lum...

Lous sabents persounages seguèron coupats pèr la venguda s'un messagiè dau canceliè de l'Universitat de la medecina, segne Roundelet. Lou serviciau veniè faire assaupre la mort dau fil ainat dau grand medeci e en meme tems dounà rendès-vous à Pelliciè e à Rabelais, de la part de soun mèstre, à l'anfiteatre de l'Universitat pèr lou lendeman mati.

— Veirés que tendrà sa paraula, faguèt tout simplement Rabelais, dau tems que Guillaume Pelliciè, treboulât que be talament, s'avalanquèt dins un fautul.

III

Toutes lous escoulans de la medecina, toutes sous magistres, toutes lous magistres de l'Escola dau drech, lous mai marcants das ciéutadins, de donas, de mounjes, l'avesque Pelliciè e sous clercs e Rabelais se quichavoun sus lous bancaus de l'anfiteatre de l'Universitat de Mount-Peliè qu'aquel jour deveniè lou prumiè anfiteatre d'anatoumià de l'Europa.

Pèr lou prumiè cop, un magistre de la medecina anava faire la demoustrança publica d'un cadabre — e l'espelhà — e aquel cadabre èra lou de l'enfant de soun sang!

Roundelet pareiguèt frech, impassible; soun front auturous èra encapelat d'aquela clarou treboulanta que la Sciença escampa à raisses sus la tèsta de sous inspirats. Se clinèt sus la taula ounte lou cadabre èra jasent e manoubret sus lous membres enredenats soun escaupre — au mitan d'un grand chut angouissant...

IV

Soulide que oi hou seguèroun de vertadiès lauraires de la Sapiença e que l'empregnèroun dau suc de sa paraula, l'Ort gaujous de las Scienças, — aquel ort ounte el-meme, quoura n'èra encara que lou magistre de drech Guillaume Grimoard, Urban V plantet sou aubre — l'empregnèroun Pelliciè-lou-Libre-viéu e Roundelet-lou-bouscaire — couma davans eles e après eles l'empregnèroun, dins la courreguda das siècles, Renaud, Arnaud-de-Vila-Nova, Jan de Sant-Gèli, Geraud de Berri, Bernat de Gourdou, Rougé de Parma, Pèire d'Espagna

(qu'escambièt la bouneta de proufessou contra la tiara de Sant Pèire e devenguèt Jan XXI), Gui de Chauliac, Placentin, Azo, Guillaume de Nougaret, Pèire Bertrand (que saguèt un jour cardinal), Douminica Sero, Pèire Jacobi, Pèire Faber, Pèire de Luna (que devenguèt l'anti-papa Beneset XIII), Pèire Rebuffi, Jaques Rebuffi (lou comte dau drech), Jan Philippi, Ranchin, Astruc, Joubert, Haguenot, Barthez, Lapeyronie, de Sauvages, — e Bouissou e Coumbal!

La prumièra — avans Paris — seguères, o ma nobla Matrìa la cièutat de la Sapiença, la font de l'Art de sannà, la branca capoulièra de l'arbre de la sciènça de regi lous poples. E partent dau jour, qu'es pamens tant liont, ounte Guilhèm VIII prouclamèt la libertat d'ensignà cadun segound sa metoda, cadun segound sa doutrina, devenguères tant-lèu, o Mount-Peliè, un mount de lum — lou Mount dau Lum, ourgullança de Pelliciè!

La Dona Capitani

Dins la pas e lou silènci de soun lougis dau Pichot-Sagèl, segne Jan de Cezèlli, president en soul de la Court das Comtes, Ajudas e Finanças de Mount-Peliè, legissiè à nauta voues pèr sa filha, dona Francesa, mouilhè de Jan de Bourciè, segnou de Barra, e soun pichot-fil, lou jouinet Ercule de Barra, la tièra de la Vida soulitària de Petrarca ounte es questioun de Guilhèm d'Aquitani — noste Guilhèm de Gelouna — e de la glouriosa lignada das Guilhèm de Mount-Peliè.

— Es aici-meme, à ce qu'afourtis la tradicioun, — el diguèt, pioi, en alargant lou coumentari de sa letura — es aici-me que Petrarca, que s'èra pausat quauque tems à Mount-Peliè pèr estudià lou drech, que Petrarca auriè escrich aquelas pajas magnificas.

— Es aici encara, digàs, segne grand — interroujèt Ercule de Barra, escarabilhat que toul ple — aici, sus lou mount de Mount-Peliè, que Guilhèm d'Aquitani atrovèt soun auferan de batalha, Bau-cent-lou-precipitous, e es d'aici que, autant fougous que valènt, s'abrivèt contra lous Sarrasins?

— De-fèt, moun car pichot, aiço's escrich dins la Gèsta de Guilhèm d'Aquitani, una de nostas epoupèias las mai preclaras.

— Lou noble eros qu'aqueste Guilhèm e couma sa vida encanta moun esperit!...

S'ausiguèt alor lou brusque aplant d'un chival sus las caladas de la Court dau Pichot-Sagèl e qu'asi tant-lèu un serviciau entremenèt davans segne de Cezèlli un poustejoun tout apoussieirat.

— Dona, — s'escrièt, afalenat, lou messagiè, entre que devistèt Francesa de Cezèlli, — dona, çai courrisse au noum de voste marit, lou segne gouvernou de Léucata, que vous baila aiço à la secrèta.

E lou courriè sourtiguèt de soun jupoun un moucadou quichat en quatre e, lou desplegant, entemenèt sa dicha:

— Lou segne gouvernou es tombat entre las mans das omes de la Liga. Era sourtit de Léucata entre dos assalidas, que se fisava à la bona fe de l'enemic. Mès lous de la Liga l'an sarrat prisouniè embè lou sen de Cambounés que l'acompagnava. Après save pas quant d'entravadisses a pougut vous faire teni aqueste escrich.

Francesa de Cezèlli legiguèt lous mots que vejaici, marcats au carbou sus lou moucadou: “ Soui pres, avisàs Dona de Barra-Cezèlli pèr qu'ela se cargue dau coumandament. ”

Dau tems que Francesa de Cezèlli salissiè dau cambrilhoun de soun paire afin d'ourdounà de boutà sella à soun chival, lou messagiè, pourgissent responsa à las questiouns que s'apetegavoun sus las labras dau president de Cezèlli e de soun pichot-fil, debanèt lou raconte dau sèti de la vila de Léucata:

— Sus la cola brecosa de sa tourrada, davans la mar que l'apara, Léucata restada fidèla à la Causa lèima e à soun representant Mount-Mourenci, empachouca l'armada de la Liga, dins soun estirada afrountada, pèr una resistança d'un encagnament qu'es pas de dire. Crese que pourran pas l'entemenà car a pèr ela soun estança estrategica, sans coumtà la vigourière ferouja de sous estajans e de sa garnisoun.

Lous que l'agarrissoun an reçaçut de ranfourçura das Espagnòus qu'an desbarcat au grau de la Nouvella e que, d'aquesta oura, campoun en riba d'Aude, proche de Narbouna.

Lous Espagnòus, hou savès prou, segne president, coubesejoun de-longa noste Lengadoc e l'encausa ié pareis bona, en butant soun espanlada à-n-una coutariè de Franceses en chamaia contra una altra coutariè de Franceses, l'encausa, sou dise, ié pareis bona d'ensajà de derrabà noste Lengadoc dau terraire de las prouvinças de la França. Mès Diéu permetra pas l'espeçage de la Patria.

— Ah! s'avièi quaucas annadas de mai! s'escridèt, trefoulissèt, Hercule de Barra.

— Segne voste paire, rebriquèt lou courriè en parlant au jouvent, segne voste paire lou gouvernou de Léucata es uu eisemple meravilhous de fermetat. L'enemic que coumprend que ié sarà jamai poussible d'atrinà la capitulacioun de la vila a ensajat de finouchejà pèr s'en apouderà. Pioi a pas agut vergougna de prepausà au segne de Barra de metre Léucata entre las mans das omes de la Liga, i'aproumetent que reçaupriè en pagament ounous, titoulets e touta mena de bens.

— Lous miserables! cridèt segne de Cezèlli, estoufegant d'endignacioun.

— Despouderats contra l'ounou e la leiautat dau segne gouvernou, lous Espagnòus i'an tesat un las: la suspencioun d'armas, qu'es dins aquel moument que l'an agantat prisouniè.

Francesa de Cezèlli, rintrant dins lou cambrilhoun de soun paire, s'embranchèt au col de l'aujòu pioi sarret soun manit contra soun pitre.

— Zou; anden! Au brulle sus Magalouna! faguèt au courriè de Léucata.

Dins la nioch s'embranchèt à Magalouna e arrivèt sensa destourbe à Léucata lou vèspre dau lendeman.

II

Dau tems que Francesa de Cezèlli preniè lou coumandament de la vila assiejada, lous de la Liga memavoun à Narbouna segne de Barra.

— Vous bailan touta une fourtuna, i'oufriguèroun lous Espagnòus, reçauprés lous titres lous pus nauts e lous pus ounourifics se nous abandonnàs Léucata.

— Una pauretat innoucenta e sensa macula me sarà sempre mai glouriosa e me metrà milhou à l'aise que de richessas criminalas e couchadas, — respoundèt impassible lou gouvernou.

Pioi-que poudièn pas l'abourdi, lous enemics bravejèroun de lou picà couma cap de familia:

— Se calàs pas, escoutelaren vosta fenna e vostes enfants.

— Fasès couma voudrés. Certa, moun degut es grand à moun sang e à la natura, mès encara mai grand à la Patria. Enaure l'ounou e la counsciença pus naut que la paternitat e que l'amour de la familia.

L'idèia ié venguèt, as enemics, que belèu ié sariè pus coumode de triounfà de la flaqueça d'una fenna e se virèroun dors Francesa de Cezèlli:

— Voste ome es noste prisouniè. Es coundannat. Placàs Léucata sensa defensa e voste marit tournarà à l'oustau sauve e segur, clafit d'ounous, de beloias e de richessas.

Francesa respoundèt: — Se voulès metre moun ome à-n-una rançoun legitima, desafeciounarai moun founs e metrai en gage mas peirariès à soula fin de lou reime. S'emb'aco trouvas que n'i'a pas prou, lougarai lou perfach de mous brasses e se voulès mai encara farai argent de moun sang, mès entemenarai pas res contra l'ounou. Apararai embé mai d'enavans, s'es poussible, la plaça de Léucata, qu'òublidarai jamai que Moussu de Barra l'a fisada à moun leialisme.

De sièis longas senmanas, cade mati, lous Espagnòus e lous de la Liga renouvèroun sas prepausiciouns desvergougnadas e cade mati, de sièis longas senmanas, Francesa de Cezèlli, enredenada dins soun sant capudige, lous ginglelèt de soun erouïca responsa:

— Lou segne de Barra, hou save, es de cor e de pensada embé iéu. Ai d'avança soun aproubacioun. S'apassiouna trop de l'ounou, afeciouna trop sa Patria pèr flacà ou souvelà que iéu flaque!

— Eh! b'alar, mourirà, clamèroun desmemouriats lous assiejants.

E escanèroun segne de Barra...

III

Francesa de Cezèlli, assabentada de l'assassinat de soun ome, escriguèt as conses de Narbouna, pèr ié demandà lou cors dau martir, una letra que restara dins l'Istòria couma lou mounument de la noublessa autiéira e de la mascla ardidessa de nosta granda Mount-Pelieirenca.

Mès lou cadabre dau segne de Barra demourèt entre las mans das omes de la Liga.

IV

La garnisou e lou pople de Léucata cridèroun venjança. Lous capouliès de l'armada, qu'enviourounavoun lou jouine Hercule de Barra, qu'èra vengut à la courreguda, embé soun escudié, entre que

I'èra toumbada la nova de la mort de soun paire, lous capouliès de l'armada ademandèroun à la véusa dau governou de bandi entre sas mans un oustage de nauta familha, lou segne de Loupian. Aqueste gentilome, amic e counfident dau duque de Jouiousa, èra encarcerat à Léucata.

— Jamai, segnes ouficiès, ié respoundèt la barounenca Francesa autant espetaclousa dins la grandetat de soun ama que dins l'enavans de soun cor, jamai, nàni jamai, iéu Francesa que l'assassin a avéusada, jamai ièu trairai à voste rancur un innoucent, car lou segne de Loupian es innoucent de l'estranglement dau noble segne de Barra.

Pèr quant à tus, moun fil, moun car Hercule, eiritiè d'un patrimòni de coustança erouïca e d'invioulabla fidelitat, siès cargat d'un noum ara trop glorious pèr lou macà dau regiscle d'un sang que sariè escampat pèr venjança.

E dau meme moument, Francesa de Cezèlli coumandèt d'enmandà lou segne de Loupian.

V

Après un ate tant magnific, la véusa dau governou prenguèt tant ben pèd sus lous souldats de Léucata e soun arderessa lous empusèt tant bravament que lous assiejats la seguiguèroun sus lous bàrris e, coustiblant emb'ela de drecha e de gaucha, luchèroun d'un tal frau que coumpeliguèroun l'enemic de levà lou sèti. Una chauma seguèt definida e Francesa n'aproufitèt pèr faire sepeli lou cors de soun espous à Léucata meme.

VI

Enric IV, meravilhat de l'intrepidat ausarda de dona de Cezèlli ié counfirmèt ouficialament lou gouvèr de Léucata fin-qu'au jour que soun enfant Hercule sariè d'age de cargà las armas.

— Segnous, diguèt lou rèi de França en legiguent l'assabé de la nouminacioun à la Court, es bon pèr lou pople de França de pensà que dona de Cezèlli, souleta, fai autant de pes dins una armada, amai belèu mai, que mous milhous capitànis. Una fenna d'un tal caratère es una glòria pèr la França!

VII

E quanta glòria encara mai bella pèr Mount-Peliè, sa ciéutat nadalenca! N'es-ti pas la flou de la raça mount-pelieirenca asatada francesca, dona Francesa de Cezèlli?...

Se dis que dau coustat de soun paire Francesa s'aparentava à la familha de sant Roc e que pèr sa maire sourtissiè de la souca Grimoard dau Roure, aquela qu'amadurèt Urban V...

Urban V, Sant Roc, Francesa de Cezèlli, la luminousa trilougia mount-pelieirenca!

Lou Cors mistic de la Patria

I

Era dau tems de la guerra de Sèt Ans: la França se desmesoulava talament qu'aviè pas prou d'omes pèr l'aparè e lou mal-astre souloumbrejava lou dardal de soun prestige. La vida pacana e la vida ciéutadina éroun paralicadas tant pèr las calamitats que descausanava la Natura que pèr las talhas mai qu'aboundousas qu'amanava l'Estat. De recoupament en recoupament, las Prouvinças, deglesidas, se dessecavoun couma las brancas d'un aubràs amalautit. La prouvinça de Lengadoc, la mai granda e fin-qu'à-n-aquel moument la mai prouspèra, avenava dau milhou que poudiè las armadas reialas de soun prouviment qu'èra à mand de s'esfourri e de sous omes que la França lous atrovava sempre prestes à respondre à soun rampèl.

Dins un tal desanament, la vila de Mount-Peliè se perfourçava de coumpli embé sa fiertat usagièra sas founciouns envejadas de capitala amenistrativa de la prouvinça de Lengadoc.

Dins quauques jours, lous Estats generaus de Lengadoc anavoun se i'acampà, couma cade an, à parièira epoca, pèr faire sa joucha e, couma cade an, à parièira epoca, la vila, galurana, s'afiscava d'elegança e de lùssi.

Pèr carrièiras se crousava que carrossas de segnous e de gentilomes e pourtantinas de prelat. Lous oustaus mèstres das persounages ouficials, lous tant bèus oustaus dau Gouvèrnament, de l'Intendènça, das tresourièrs de la Borsa das Estats e das tresourièrs de França, amai lou palais avescau, s'enfestavoun.

Enco de Moussu de Sant-Priest, intendent de la Prouvinça e letrat delicat, se preludiava à las vespradas moundanas que, de tout tems, acoumpagnavoun la tenguda das Estats, pèr una aculhença ounte l'entendent presentava à sous counvidats un curat pacan, prouteciounat dau marquès d'Aubais, l'abat Jan-Batista Fabre. L'abat, d'imou galoia mès bon couma lou pan, legissiè à la coumpagna, que se ié capitava d'omes de la noublèssa fricauds d'escrichs esperitais dins la lenga dau pople, un pouèma erouic-coumic Lou Siège de Cadarroussa, que d'una vouès unenca, l'auditòri n'en reclamava l'estampage.

De soun coustat, moussus dau Tiers-Estat s'estalavoun dins lous noumbrouses lougis e auberjariès de la vila. Lous que cargavoun la rauba s'estremavoun au lougis de la Souca dau tems que lous que cenchavoun l'espasa e que, de mai, avièn de pichots revenguts, demouravoun à l'abitarella dau Pous de las Esquillas. Lous lougis de l'Eiglàs d'Or, de la Rosa, das Tres Rèis, dau Ciéune, dau Capèl-Rouge recatavoun lous autres deputats dau Tiers.

Lous coumissàris dau rèi fasièn troumpetà à las crousièiras, au mitan de l'escarrada, d'ordre de sa majestat Louis XV, l'alandada das Estats pèr lou lendeman. A la mema oura, lous estudiants de la medecina tratavoun en ribota lous das delegats dau Tiers qu'éroun de soun país nadalenc, dins la vasta sala dau lougis de la Crous d'Or ou dau Moutou d'Or e, à la fn dau repàs, lous taulejaires mandavoun au mitan d'eles, pèr ié semoundre sous coumpliments, mète Moutou el-meme, que sa fartalha chanuda e goustousa e sous vis dau cantou éroun de renoum dins touta la Prouvinça.

Lou dijòu mati, soulennament se doubriessiè la sessioun das Estats generaus, après la messa dau Sant-Esperit, dicha dins la glèisa de las Taulas, vesina dau Counsulat.

Dins la granda sala dau Counsulat, esclairada pèr de larjas fenèstras e adournada de magnificas tapissariès, èra quilhat un long pountin apielat contra las parets dau founs e das dous coustats, en façade de la porta d'intrada. Acos èra lou naut banc ounte siejavoun, d'abord au centre, jouta un pàli, mossen l'archevesque de Narbouna, primat de las Gaulas, president-nascut das Estats; à sa dèstra l'archevesque de Toulousa e l'archevesque d'Albi; sus lou las, lous avesques de la Prouvinça e lous vicàris generaus delegats de soun chapitre e dau Clerjat; à sa senèstra, lous barouns e, après eles, sus lou las, lous delegats de l'ordre de la Noublèssa.

En bas dau pountin, dins lou perterra, s'assetavoun lous deputats dau Tiers-Estat. Au mitan, lous delegats de las vilas capoulièiras: Toulousa, Mount-Peliè, Carcassouna, Nimes e Narbouna, e, davans eles, ras d'una taula tapissada de velous blu aflourdalisat embé la crous de Lengadoc: lous tres sendics generaus, lous tresourièrs das Estats e lous grafiès.

Aquela anada, mossen de la Roca-Aimoun, archevesque de Narbouna, grand aumourniè de França, coumandou de l'ordre dau Sant-Esperit, avié pas pougut çai veni pèr lous Estats. La sessioun èra aladounc presidada pèr mossen de Diloun, archevesque de Toulousa. L'acamp compreniè: doux archevesques, trege avesques, ioch vicàris generaus, ioch barouns, quinge delegats de la Noublèssa e seissanta-ioch deputats dau Tiers.

Lous prelat èroun atrencats dau camai viòulet e dau rouquet de dentella; lous vicàris generaus èroun couifats de la bouneta carrada; la noublèssa poutava l'espasa e lous moussus dau Tiers qu'èroun d'espasa avièn cenchat soun glàsi, lous qu'èroun de rauba avièn cargat la toga.

Après lou ceremouniau d'intrada, la sesilha seguèt doubriada pèr mounsegne lou duque de Fitz-James, par de França, lioc-tenant generau gouvèrnou dau Naut e dau Bas-Limousin e coumandant en cap en Lengadoc, jouta lou comte d'Eu, gouvèrnou de la Prouvinça, ajudat dau viscomte de Sant-Priest, intendent, e das tresourièrs de França.

Lous grafiès legiguèroun las lettras clausas dau rèi: lou duque-coumissàri seguèt de parlament e mossen l'archevesque-president respoundèt. E se clavèt tant-lèu la prumièira sesilha afin de laissà travalhà las coumissiouns.

A la vesprada, lou clerjat e lous prelat s'arroudelèroun davans mossen Francés Regnault de Villa-Nova, avesque de Mount-Peliè, au palais épiscopau. M. l'intendent de Sant-Priest retirèt lous barouns e la noublèssa; lous dau Tiers anèroun charrà enco de sous amics de la vila.

Mès lous das moussus das Estats, de quante ordre que seguèssoun, que se chalavoun d'ausi de bona musica, trevèroun de preferença lous salouns de M. de Vichet, tresourié de França, que sous councerts fasièn miranda.

Lous autres jours, las coumissiouns desemboulhèroun l'escagna das proujèts, das plans e de las despensas. A la fin de la tantossada, lous amatus de causas requistas, lous biblioufils e lous arqueologues s'apreissèroun dins l'oustau de M. Jacintha d'Agra-Fiolha, prumiè president de la Court das Comts. De las Ajudas e de las Mounedas, que ié fasiè las ounous de sa bibliotèca tout ple garnida

e de sa preciosa rejouncha de medalhas ounte segnourejava, peça rarissima, una medalha de loutoun, atrovada à Nimes, une medalha à l'effigè de l'empeire Augustus, divus Augustus.
Arrivèt lou dimenche; après la messa granda se descourdelèt pèr carrièiras la proucessioun dau Sant-Sacrament. Las troupas reialas alandavoun l'escourtada; las counfrariès caminavoun de seguida: lous Crousets, que sous bastous d'argent beluguejavoun dins la sourelhada: lous penitents blancs, cantant las innas couma eles souls savoun las cantà; lous blus, brandilhant emb'acourdança l'encensiè — e jouta lou pàli de drap d'or, lou Sant-Sacrament èra pourtat pèr moscen de Mount-Peliè.
Seguissièn de tras en tras, emb'un cire alucat, mossens lous archevesques e avesques, lous delegats dau clerjat, moussus lous barouns (qu'amalha en capa, M. lou comte d'Alès), lous deputats de la Noublessa e lous delegats dau Tiers.

II

Aquel dimenche, à miejour, s'enjenguèt de fèstas pèr lou pople. Dansèroun lou Chivalet e las Trelhas, que se poudiè pas milhou acabà lou tems de las vendémias, car s'atrouvavoun au mes d'otobre.
Quauques segnous, decans das Estats, s'espaçèroun en carrossa dau coustat de la Maussou pèr s'assigurà de sous iols s'èroun vertadiès lous dichs e redichs de l'un e de l'autre. Se disiè, de-fèt, que lou nouvèl proupietàri dau castèl de la Maussou, M. de Guilheminet, èra en trin de lou faire peri en mousselant las terras e lou pargue d'aquel meravilhous tenament.

— Es-ti possible, s'escrièt un vièl baroun, es-ti possible d'escampilhà antau, e Diéu sap ounte, las estatuas das diéus e de las divessas, lous groupes de bèstias, la cascada de maubre rouge e lous grands vases de pèira finament ciselats! Coussi? Desmargat, atabé, l'operà en menusa ounte moussu de la Maussou se coungoustava de veire dansà madoumaisella Pichot-Pas, qu'el l'aviè raubada à Paris. Venduda la biblioutèca e la tièira de tablèus de l'Escola flamenca! Veirés, moussus, que lou castèl el-meme sarà lèu la proia das creditous.

— Aïço deviè arrivà antau, arremarquèt un autre gentilome. Remembràs-vous, vous n'en prègue, moussus, l'espetaclousa aussada souciala das Bouniès, de Jòusè Bouniè, que lou rèi n'en faguèt Moussu de La Maussou.

Rèire-pichots-fils d'un d'aqueles marchands de lana e de drap que s'en countava tant, d'autres cops à Mount-Peliè, lous Bouniès, devenguts tresoriès das Estats, fan carage de grands financiès. Jòusè Bouniè viéu que pèr faire lanlèra e çai bastis aici, pèr sas drilhaças e sas tantaras, un pichot Versalha, ma fe, prou ben capitat.

— De-fèt, i'ai vist — coupèt lou vièl baroun, — de fèstas mai que prou bellas en l'ounou das Estats.

— Dins la seguida, una Bouniè, Anna Bouniè, devenguèt duquessa, duquessa de Chaulnes, en espousant lou duque de Pecquigni.

— Pèr aquel maridage, Moussu de Pecquigni prenguèt de femiè pèr engraissà sas terras, seloun lou counsel de sa maire, — ajustèt d'un èr chiflaire lou vièl baroun.

— E touta aquel glòria de rescontre s'es tant-lèu passida que nautres vesèn mouri d'una mort penousa lou galant castèl de la Maussou...

En rintrant en vila, lou vièl baroun faguèt arrestà soun carrossa au Peirou afin de belà lou traval gigantesc dau grand eigau de las aigas le San-Clament que l'architèite Pilot èra en trin d'acabà — e tout lou bèu mounde que s'atrouvavoun aquí s'acourdèroun de recounouitre que lou Peirou èra ara trop pichot pèr caupre un tal oubrage d'art.

— Lous Estats de Lengadoc, respoundèt Moussu Antòni de Cambacerés, maire de Mount-Peliè, que desvouloupava d'esplicas as visitaires, lous Estats auran lèu de voutà soun agrandiment. Cau faire dau Peirou un testau que sarà lou miradou de la ciéutat sus la Mar Latina e las Cevenas nostras!

III

Lous Estats de Lengadoc tenièn sesilha. Lous raports das coumissàris e lou proujèt dau buget de la Prouvinça èroun adoutats sensa countèsta, à l'ourdinàri. Lous imposts èroun despartits emb' equitat. Tout arresounament èra oucious, car cadun mètiè pas sa pelha à la bugada — e s'oubrava foça.

Lous Estats de Lengadoc!

Lou grand rèi, lou Rèi-Sourel el-meme sentissiè soun poudè quichat pèr la puissança de nostes Estats. Paris ou Versalha poudièn pas plaçà de troupas en Lengadoc sensa la counsentida das Estats. Louis XIV lous soulicitava!

Lous Estats tenièn sesilha. L'ordre dau jour èra abenat quoura l'archevesque-president anouncèt que pioi-que se capitava tant d'embouls e d'entravadisses dins las finanças dau reiaume e dins las armadas de la França, el, de soun sicap, aprepausava as Estats de Lengadoc de voutà pèr crida la coustrucioun e lou doun au rèi d'un bastiment de ligna de quatre-vints canous.

— Es ben entendut, el ajustèt, que lou còsti dau bastiment nostre sarà pagat embé lou mountant de las mostras

(indannitats) das barouns, das delegats de la Noublessa, das prelatz e das deputats dau Clerjat.

— Amai das deputats dau Tiers-Estat! s'escrièt tout fernissèn d'esmoucioun patrioutica, lou capitoul de Toulousa, Jan Faget. Iéu vous dise, au noum dau Tiers, que dins l'ordre de las proupourciouns, lou Tiers vòu prendre sa part de la despensa qu'es à-n-el couma à vautres, mossens e segnes, de s'ascoucià pèr las demoustranças e las provas efetivas d'amour e de fidelitat pèr lou Prince, d'ardersa e de courage pèr lou bèn de l'Estat.

E d'ausida, l'Assemblada voutèt l'oufrenda dau bastiment pèr lous tres ordres das Estats, amai seguet arrestat que lou bastiment sariè batejat dau noum Lengadoc...

Antau, à l'oura meme ounte, d'après lou mot de Castelbriand *le bon ton était d'être anglais à la Cour, prussien à l'armée*, à l'oura ounte tout s'engrunava jouta lou cièl bouchard de França, nostes Estats de Lengadoc: clerjat, noublessa e pople, units e enliassats, se prouclamavoun soulennament franceses e oubrovoun de maja façoun pèr la França — bèl eisemple de patrioutisme que las autras prouvinças seguèroun be oublijadas d'imità...

Lous Estats de Lengadoc — disiè un vièl adàgi poulari — fourmavoun lou Cors mistic de la Patria de Lengadoc.

Seguèroun eles, atabé, la beloia dau Mount-Peliè das XVIIe e XVIIIe siècles — de Mount-Peliè capitala!

Lou roulèu soucial e poulitic que, as tems de ioi, arrasa tout, l'a aclapada la nobla capitala! Mès se virarà pas jamai dau coustat dau pounèt, moun Mount-Peliè, pioch linde e siau, caumat dau sourel!...

Seguissè las diversas etimoulougias de toun noum e lous diferents apelaments que tous grands persounages t'an proudigat emb'ounou, o Mount-Peliè, o ma Patria! — e vese que se siès pas pus lou truc, lou mount de richessas dau tems — toun pountificat! — de toun coumèrci de mar; se siès pas pus lou mount de pèiras, sèti de l'edifice qu'éroun lous Estats de Lengadoc, demores lou suc, lou mount de las bellas manidas, lou sup, lou mount alandat pèr la courala aculhença — e toutas las pajas de toun istòria prouclamoun lou refresc de countùnia dau vot — ara d'afouns realisat — de Guillaume Pelliciè: siès ioi couma ièr, e sempre istaràs dins la courreguda das siècles, pèr la sapienca de tas doutrinas e lou poudé de toun enseignament, un clapàs de scienças, un mount de Lum, — lou mount dau Lum de nosta Terra d'Oc!

12 de Setembre 1913, Mount-Peliè.

Se Dieu me prèsta vida, enregarai una segounda tièira de douge racontes d'acioun pèr la Legenda de la Patria au XIXe siècle, jouta lou titre l'Oustau de moun grand.

© CIEL d'Oc – Mai 2006